

兩浙輶軒續錄

兩浙輶軒續錄卷二十七目

朱王林 湯錫蕃 趙 鉞 吳衡 楊思敬

周 凱 馬步蟾 王衍梅 陳德調 李載懋

郝 蓮 趙之琛 武蒞莊 蔡紹周 鍾大源

潘鴻謨 朱佩蘭 范 錯 施希潤 沈惇彝

王 渥 王炳業 董 詔 鄔慕東 徐 璽

吳清皋 孫 觀 趙 泰 鍾鴻慶 沈元熙

俞萬逢 陳昌穀 沈正楷 鄭祖球 陳 僅

王映玉 張允提 金家修 董長庚 余 鈞

陳敬祉 陳含輝 韓勝良 許承露 錢廷煊

高日濬 查奕善 岳鴻振 勞 鏞 陸樹蘭

俞思源 朱 雷 胡世巽 朱廉洽 虞廷宣

潘希淦 牟景皋 陳培元 張璜 周中孚

周樹 高應元 張金照 楊炳堃 施錦心

王德沛 沈厚 洪震煊 李誠 王夢庚

鄭桂金 余鏗 朱寓 章柱 李士京

王懋功 姚光烈 楊棨 張襲 陳杞

吳長卿 錢時穎 朱震培 蔣開 張咸德

岳灃 胡金勝 沈榮慶 沈三秀 盛植麒

王銘 鄭衡

兩浙輶軒續錄卷二十七

督學使者潘衍桐訂

朱王林

原名霞字禮卿號小雲平湖人嘉慶辛未會元官直隸清河道署按察使著小雲廬詩稿剛存五卷

縣志王林服官中外三十餘年謹操守勤職司為同寮所推重告歸後日讀邸抄凡關係時事者必手錄之蓋

未嘗一日忘天下也平生自奉儉約而周濟貧乏雖多金不吝戚族待以舉火者數十家卒之日人咸思之著

有晚學文稿八卷常湖朋舊遺詩十卷當湖文繫二十四卷

陸沅序略君弱冠登賢書遂肆力為古今體詩迺躡蹻禮闈者十年浮沈郎署者又十年加以中年悼忾開歲

失怙諸甥天逝舊雨凋零俛仰生平愁多樂少惟南宮領袖滇海馳征實為詞臣榮遇既而三載柏臺一麾出

守簿書鞅掌嘯詠為難三復斯編三十餘年離合悲歡之致登臨眺覽之奇歷歷俱在紙上也

乙丑首春辭家北上兼別陸芷江內弟 沅 二首

吾飢苦食盡吾寒愁衣單拂劍壯心動漫欲游長安低頭向

親友奔馳力亦殫囊中稍有藉便當跨征鞍不惜行者瘁還

念居者難減吾行路資聊佐菽水餐揮手出門去欲語猶千

端

吾有平生友膠漆心不移  
相期各努力雲路同驅馳  
惡風忽吹散君痛庭萱萎  
今當遠行邁惜別重致辭  
暮年境蕭瑟門戶況獨持  
曲體嚴親意勿使暗傷悲  
但看梁月落是我思君時

文德關

昨行焦谿山險窄懷不暢  
今朝境一變山山插天壯  
曲棧紛鉤連危梯絕依傍  
前行奮先登後者從下望  
意謂攀躋難瞥已層霄  
上人馬一髮懸此景極飄颻  
雄關踞崖巔屹立森相向  
羅甸此咽喉黔滇亦屏障  
天門闕闔開雲光鎮摩盪  
會當躡飛仙振衣發高唱

中宿峽

帝子昔采竹遠游茲棲遯芙蓉對面青白雲飛不盡喬松經  
千霜蟠株覆層巘猿磴風中開鶴巢煙際隱琤琤一斛珠天  
半瀉虛牝迅波走不停混涵接海蜃到此始一束造化巧樞  
礎山空樵響答日落鱗聲緊望望飛來寺晝靄松門晚

上灘謠

何人拋彈澄江中千堆萬堆灘石重截水與水爭抵捍噴薄  
寒玉雷殷空輕舟逆流溯灘上進寸退尺難爲功刺篙越女  
氣力薄汗珠亂迸桃花紅淞東山川信清美只有灘聲愁邈  
迤驚湍十里九停橈到處人心不平似昨誇下灘放溜輕今  
日來舟亦窮矣君不見天公不雨谿縮流石面祇餘一尺水

舟中書懷

鄉近翻愁遠張颿向夕征荒汀孤雁下獨樹亂雅爭見月渺

離思繙書多古情寸心將母切何計慰歸耕

奉

命典試滇南出都書懷二首

錄一

人海浮沈已十年飄蕭短鬢笑華顛劇憐噓植由

天意便許乘槎到日邊萬里雲山迎使節三冬燈火憶寒毡

碧雞金馬鍾英地要取驚才絕豔篇

湯錫蕃

字畫人仁和人嘉慶辛未進士官翰林院庶吉士

杭郡詩續輯畫人工書法為梁山舟學士所賞以妹妻之

遣興

賢愚天壤隔厥心同好名偶來區蓋閒靜聽月旦評鄙夫一

長取揚揚意氣盈人或怪器小我謂適得不螻蟻獲蜻蛉私

喜膺大烹奈何對螻蟻而繩以人情

爰居止東門亭之用牲饋肉乾已多時未具食肉腹異數日  
以加生機日以蹙不如歸海天長自隸羽族乃知身世交前  
定猶飲啄可怪斗筲人爭食僅雞鶩獨有非分想魂夢時耽  
逐奇逢便倘來看君消受福

扁舟涉大川瞬息通萬里今茲傍牖行習坎頻池遷兩牖相  
去交其長尺有咫一關俄一闔堅絕勝壁壘如聞鷓鴣嘯頓  
覺歸心死行遲不敢嫌但嫌行且止遲者有時至止者長已  
矣持語會心人舟行尙如此

鐵畫歌限十五咸韻

唐吳道子畫中聖使筆如鐵超塵凡此能百鍊化繞指聚六  
州以供鐫刻想當柳陰坐鼓棗心有所感由至誠赫然大一  
下臨眎丁甲欲攝神明監或爲野平遠或作山嶮岳或摹沅



蘭或湘竹風枝露葉交相銜森森寫叢薄貌出枯柏兼松杉  
鏘鏘狀飛走飛者鷹鷂走者鸞鳳巖煙青煙白察火候出冶  
幅幅皆空嵌紗籠紙拓影通透懸玉堂地清而嚴亦如開元  
普門壁但容瞻仰難封緘豈無珠貫與繡錯陋彼女手拈摻  
摻寶刀按便屈成鏡頑石吐可張爲帆何須皴染禍縑素未  
要鏤刻稱珉瑛洪鑪烈燄挺芑角寄語羣蠹休貪饒吁嗟良  
金失良冶致範炊釜模耕鑿質黔辱烹爨鋒鏘勞鋤芟金精  
埋冤訴眞宰黑帝魂遺招巫咸圍之以大瀛積之于叢巖膏  
塗更錫拭穎出姿巉巉神奇變朽腐功仗火一杵其閒月鍛  
復旬鍊匠巧不許他人攬別開生面異白戰從舊樣外翻新  
函毛錐何如鐵錐利轉覺畫錄畫譜言徒僂使磨礮糜展側  
理兔定掃禿中山髡祇愁造物忌能事鑠以眾口終遭讒不

見前朝戴文進釣魚師偶緋其衫火攻固是守下策嗜與眾  
史殊酸醜詩成待質願加點錚錚細響慙詰誦

趙 鉞 原名春沂號雱門仁和人嘉慶  
辛未進士官江蘇泰州知州

東軒吟社圖傳略雱門幼而嗜學於濂洛關閩之書尤  
能探其奧蹟通籍後以庶吉士改官縣令積階州守為  
政懲優柔之失一意嚴明後引疾去主荅南書院校文  
亦苛以理法故課作鮮當意者晚年遁于禪學家富收  
藏歿之前以明趙忠毅公鐵如意贈謝某意恐珍物流  
落俗手或失所主亦達矣哉箸有  
國朝謚法攷  
傳于世

黃薌泉 士珣 屬題其仲父蔭人先生秋江采魚圖

為感池塘夢因留翰墨緣百年文獻合一卷畫圖傳得失本  
無定子孫誰象賢舊家池館在多少付雲煙

吳衡照 字夏治號子律仁和人海甯籍嘉慶  
辛未進士官金華教授著辛卯生詩

諸可寶傳略君中年通籍當就縣令自以不耐煩劇請  
改校官可以知其心之閒澹矣善詩文尤工填詞所著  
或 吳衡照

蓮子居詞話擊索宗旨區別名體非汎事鈔撮者  
 所得同日而語也又有辛卯生詩四卷刊傳于世  
 吳應和序略辛卯生詩四卷純古清剛之氣如其為人  
 成進士後謁選得金華教授坐萬山中日手一編消磨  
 壯志絕去標榜結納之習世事紛華仕途顯赫都不挂  
 眼惟盡心於文字閒以就必傳之業其志可謂篤矣  
 胡敬曰古詩有樸淡亦有濃腴有謹嚴亦有變化近體  
 出入唐宋步武從容因題而施不拘一格亦足為  
 國朝六家  
 詞響

擬唐人觀獵

鼓角鳴高臺  
 干山人面開  
 溼雲盤馬過  
 斜日按鵬迴  
 宇宙休  
 戎事功名老  
 霸才將軍非  
 好武乘興幾  
 回來

鐵忠定公祠

刀頭血肉見高皇  
 白髮羈囚淚萬行  
 下版奇謀聊底柱  
 中原急難屬封疆  
 囚人隧道增嗚咽  
 列宿緋衣並慨慷  
 勒馬明湖祠畔路  
 誰華山色莽蒼蒼

萬松嶺雙節墳

嘉慶元年春有客云是直隸之村民夫姓崔婦姓陳夫挈婦來覓親覓親不見他鄉各異縣路窮窮殺人日夕淚洗面婦語夫計安出路迢迢歸奚日賤妾與君共舖糜糜不可得君奈何君無奈何妾則那夫聞婦語哽咽心脾糜不可得且忍飢道旁聞者咸歔歔道旁人相謂何乃苦憂煎守石田不如逐彈丸五雜組顏色鮮往復還非少年不得已姑從權與其餓且死孰若夫婦謀兩全逆旅走相告道旁人云然夫聞走告婦逆旅有此言非是逆旅言道旁人云然婦聞仰頭答君言胡出斯結襦爲夫婦所願長相依何圖不共保身賤理不微逆旅焉知其計非嫁犬隨走嫁雞隨飛甘爲蝴蝶瘦莫效鶉鳩肥成事有翻覆立心無轉移妾自入君門生死爲君

妻生則隨君行死還攜骨歸君今善自愛勿復念妾爲夫聞  
再拜跪卿言胡出斯始我出門日約爾與南來爾意本不欲  
強爾與我偕石田乏秋亦云孔哀彈丸盈掬予懷之悲當歸  
旣成錯獨活將向誰地下黃泉容爾我生同命苦死同隳夫  
婦兩側側信誓各無違哭聲夜半寂雙挂連理枝逆旅曉排  
闥赫然驚兩屍人閒有節義惟此兩屍知逆旅都歎息道旁  
聞者咸歔歔湖水清清江水渾南山山麓樓臺魂自古匹夫  
匹婦守死志不奪道在詎以尋常論君不見萬松嶺乃有雙  
縊墳夫姓崔婦姓陳

遊南山尋煙霞石屋水樂諸洞

一洞豁然敞一洞窈然曲愁猿不敢嘯倒挂白蝙蝠日色秋  
蒼涼餘映散巖谷混沌鑿不死妙手剡其腹中空嵌玲瓏亂

點莓苔綠我來白雲飛我去白雲宿一我一白雲都在石佛  
目南山勝絕處煙霞與石屋一洞泉涓涓遺聲聽水樂

莊芝階席上詠竹筧

斷竹復續竹通水妙用筧我行入山中清泉正進行絕似汞  
瀉地好在肉貫弗奚翅符半剖橫陳界翠巘銜尾接奔赴刻  
節縱流轉迴合曲門筧層折迭導竅吞納旣汨汨疏引但宛  
宛俯注承以仰近給供自遠初疑內外蛇鬥罷互息偃豈意  
調水法盡頭各彌滿智笑轆轤拙力患枯樺短晝夜響不停  
天機信非淺鉤連灌庖福恰稱高僧嬾儻然變作酒便當碧  
筒卷

送查南廬

世官

偕孫古雲襲伯

均

入都

吳越祠邊橘柚紅送君畫舫日曛隴周瑜顧曲年才少陸抗

談兵氣獨雄。簫管調鸚香。稻粒綺紈走馬玉花駿。通侯愛客  
從來事。況復籌邊最工。

佚蕩湖山不計年。詩人蓬轉例遊燕。狂歌座上眞名士。爛醉  
人閒小謫仙。芍藥凝香風暖地。葡萄釀乳月明天。溫家老母  
秦家婦。燈火金闈思惘然。

同人分題武林古蹟得柳洲張子野舊廬

詩人老去笑顛狂。燕燕鶯鶯鎮日忙。三影無雙才調美。一時  
有雨姓名香。坡公翰墨眞藍本。功甫園林舊草堂。試望柳洲  
隄畔路。沿城秋色正蒼蒼。

殘梅

冷傍溪橋瘦。傍門霏霏半樹淡。孤村仙人萼綠遺。珠佩倩女  
昏黃褪。粉痕餘韻任憑風。作主暗香留與月。句魂莫教吹徹。

江城笛便逐梨花撲酒樽

雨中集汪小米遠孫半潭秋水一房山觀瀑

萬雨排檐急如弩水氣四壁作龍舞回頭笑看房中山山坳  
流水鳴潺潺一卷圍畔橫年深推不去吾曹合與山有素坐  
對飛泉滌塵慮瑤池噴落蒼苔鮮暗從山脊經山巔雪花亂  
跳白洙乳雲氣倒垂青冥天錯疑幽澗入城走未秋先訝銀  
河懸東海道人狂欲仙腳踏兩枝枯樹邊玉壺買醉枕石眠  
誦罷廬山謠夢作廬山行廬山仙人不可見石門寒吹遙琮  
琤何當結屋林霏處來聽風聲雜雨聲

楊思敬原名楊龍子揚菴號存之海甯人嘉慶辛未進士官福建安溪知縣著羣雅齋集

海昌備志思敬政尚簡靜嘗導氣缺邑人頌之詩宗初盛唐為同輩所推服

杭郡詩續輯楊菴少穎悟年十三即熟精文選及冠沈潛嗜學雖生長華閩不殊寒素工詩及駢體文同里周



松露陽湖孫淵如秀水沈帶湖諸先生皆極賞識容京  
 師與張船山吳山尊兩先生往還唱和尤多迨成進士  
 出宰安溪期月而罷留榕城教授者  
 凡七年道光壬午冬歸逾月而卒

曉經太湖

夜談五湖奇殘夢墮雲水七十二山靈夢中呼我起湖平月  
 稍落極望波瀾瀾人語寒蘆間中有漁舟艤長煙迷白鷗平  
 林沒青薺俄頃朝陽升萬象歸眼底修蛾翠若掃匹練淨於  
 洗不知遠峯外湖光復幾里豈無濟勝具坐惜孤帆駛一舸  
 儻浮家發興自茲始

感事

淮黃巨汎畏逢秋壁馬頻煩祝史投自古防川無上策本來  
 歸海有經流

聖明豈惜捐金費兒戲身為捧土謀差喜哀鴻幸無恙徙薪

先解避陽侯

蠻鄉

誰道蠻鄉作宦非  
娛人風土欲忘歸  
終年草樹無黃落  
到處軒窗有翠微  
民狎犁鋤爲客少  
吏疏刀筆在官稀  
敢將臥理矜高尚  
暇日鳴琴試一揮

從軍行

匹馬度陰山  
黃沙一望閒  
陣雲低壓帳  
邊月迴臨關  
擊鼓消春色  
烽塵損壯顏  
深聞知報國  
未敢唱刀環

憩萬峯庵

幡影香臺畔  
蕭然晝掩關  
客依幽鳥坐  
僧帶野雲還  
一徑入紅樹  
半窗橫碧山  
平生清絕意  
喜得暫時閒

晚晴散步湖上

湖光洗出碧玻璃遊屐微沾雨後泥斜照忽明孤塔杪落霞  
都在亂峯西一林晚磬煙藏寺十里秋荷水拍堤乘興卻忘  
歸路暝步隨漁火度前溪

周

凱 字仲禮號芸皋富陽人嘉慶辛未進士

家傳略芸皋舉學問淵雅居詞苑者十年師事董文恭  
習山水與李曉桐袁少廷討論深得畫家三昧出守襄  
陽濬復高陽池以溉民疇設各屬義塾以維風俗勸民  
種桑飼蠶以詩為教尤關治化遷漢黃德道著疏濬漢  
水內外二河故道及黃州應疏河道二議勘督工役實  
事求是調閩南輯廈門金門二志濯中州廉訪以終  
吳德旋序略芸皋嘗受經于張編修臯文而得其傳至  
分巡閩海交高舍人雨農而文日進出入習之永叔子

甫問

緝雅堂詩話余覽內自訟齋文鈔所載明監國魯王墓  
考墓在金門城鼓岡湖之西道光壬辰始訪得之為鐫  
王手書漢影雲根四字並從公諸臣題詠樹碑作記以  
示其事此文之有關掌故者芸皋詩集未見茲從高陽  
池修祿圖得  
詩一首錄之

高陽池落成修禊詩

我本山陰客今作襄陽守上巳逢佳辰高會集耆舊况復高  
陽池池館開林岫桃栽蔣侯穠柳補張君瘦綠池多芙蓉柔  
蕙及春透山花紅欲然水綠波生皺曾讀雍州記修禊此其  
候告我諸父老當以樽酒酌我初謀濬池畝畝旱潦救東西  
利溝渠上下置淤溜去年刈新稻酒味釀清厚今年植新麥  
隴首鋪綺繡俯觀鯨魚泳遠聆馴雉雊迴顧亭與臺劉子愛  
結構春搗一載餘子來若恐後江山足眺覽耒耜期殷富靈  
境仍自然游賞勝園囿諸君今達官獨樂古所陋曷不賦詩  
新名與此池壽蘭亭亦已矣山公不可又廢興會有時且共  
娛清晝日暮眾賓散惠風吹衣袖

馬步蟾

字廣周號漁山會稽人嘉慶  
辛未進士官安徽徽州知府

孫德祖傳略先生始為諸生課叢山書院累居高等念

地為劉忠介證人講社故址不當以文藝名由是潛心

理學制行一以儒先為歸及以翰林入御史臺即疏請

劉子從祀兩廡其後福建以石齋黃子請河南以新吾

俞旨寔自先生發之先生幼嗜書得香光筆法成童即以書

名不肖中角及見先王父坐右張先生楹帖嘗舉示小

子為言先生在史館應

認寫經特荷

仁宗睿皇帝嘉歎庚寅生山東試例用三品以上官先生以

特簡異數也

宣宗成皇帝御極奉

命恭書

七廟神牌拜白金文綺之

賜蓋吾鄉以善書濟

懋賞者先生為最云

次石友親家載生歌元韻木事詳杜徵君照題注

郎君富文史宜作龍門客先生聽天香足以娛旦夕飛觥恣

歌呼麴糵亦可溺胡為詩興狂騎鯨尋李白河伯老解事聞

道已過百預識冰人來救勿鱗臣迫執柯世倘懲娶婦吾何  
得先生本地仙消水有妙策景純一抔土尚能脫江厄當前  
七尺軀肯令化湘魄鼎宮真通明玉山借頽息笑顧廣利王  
醉墨題殿額署名書載生擲筆見喜色從今天上選仙圖不  
妨別造停年格

王衍梅 字律芳號笠舫會稽人嘉慶辛未進士著綠雪堂遺棄

本集紅杏邨人傳曰六經無邨字而以邨名其人則猶  
未免為邨人也此人之邨在會稽之城南邨有寺曰杏  
花寺先世皆長者父以杏邨為號取必醉有靖節之風  
翁筵也少讀書不求甚解飲酒期在必醉有靖節之風  
瓊筵羽觴坐花醉月有青蓮之樂嘗成進士放歸遂游  
嶺南一住六七載好吟詠詩無常格暇輒塗寫不名一  
家私構一章曰聊以換酒然無酒亦書或媚以花菊便  
折然忘倦一日復讀五柳先生傳而歎其高顧謂所親  
日以我為桃花源漁人則方今太平之世也如以為東  
海釣鼈客則青蓮在前不得自專也無以故邨不可忘  
其紅杏邨人乎其紅杏邨人乎贊曰邨人所居有綠雪  
草堂今之紅杏邨人宅日之綠雪堂也街觴賦詩以

南折梅年賣錄 卷二十七 王衍梅 十

樂其志讀書鼓琴若將終身今之綠雪堂也黃髮垂髫  
怡然自樂白雲飛鳥倦而知還宅日之紅杏邨也此人  
也非無懷葛天之民而

熙熙然長為太平之人

汪云任序略君幼有異稟讀書十行俱下父冠英先生

督課甚嚴日緇取十三經令背誦不遺一字辛酉貢成

均出儀徵阮相國諸城劉文恭門下名噪一時性高曠

嗜酒暇則手一編默坐覽畢即棄去篋中僅殘書百十

册而屬詞比事貫串古今他人不能窺其涯際成進士

則許要津失高等及縣令改廣文迄無所就而罷才豐

遇嗇豈文人賦

命果如是與

冷廬襍識笠舫豪于詩嘗謁鼓山掌教陳太守廷慶適

有餽江瑤柱者曰子能用饒字韻賦此者當烹以酌子

因押全韻成詩其警句云升沈一柱觀闔

闕兩當衫太守歎為絕唱遂奉觴以酬之

孫德祖曰先生先以高才生受知儀徵阮文達公以屬

代者選拔貢成均旋成進士出宰粵西緣事落職文達

開府兩廣招入幕府仍跌盞詩酒巖頤以終其佚事越

中婦人小子皆能言之幾奪青藤之席讀先生自撰紅

杏邨人傳彷彿如見

其人于隋前晉後矣

梅墅二十四韻

箕子垂裳日周公秉鉞年五侯屯若霧一尉去如僊白雉妖  
氛熾黃龍殺氣纏誰臬新莽舌克荷孺嬰肩玉璽驚投地金  
滕敢册天恨難重滅霍悔不再誅賢使者徵龔勝諸生救鮑  
宣羣倫俱已矣夫子獨翛然疏廣東都外逢萌北海邊屠螭  
知事早鱸膾決幾先漢臘應長奉吳門豈浪傳浮家攜眷屬  
避地得林泉藥滿韓康市花隨范蠡船神龍不見尾俊鶻枉  
張拳鏡浪搖虛壁谿雲蓋短椽漸臺看斗轉大澤對星懸拜  
爵曾褒孔尊師定謁延併將彈鳳疏竊取獲麟編神武冠從  
挂僧真榻屢遷甯甯論絮舜嶺可匹梅銷自古哀文種由來  
笑褚淵鸞凰一長嘯泉鏡兩無權後起逃鈞黨餘波乞剡川  
高風渺何處歸路但蒼煙

讀三國志



晉承魏祚壽臣晉義無帝蜀蜀乃黜漢吳之辭載盟府收漢  
爲蜀亦壽筆益州先主誰所稱論蜀流傳鍾會檄朝廷主公  
年十八孔明此語疑竄入史家曲筆信有之爲諱爲私難究  
詰白頭江總已仕隋思廉濫向陳書列大手試刊西漢誤遺  
文未補北齊關內遼外遼傷體例別史亦存契丹國辨亾之  
論由陸機強寇王師早錯出首曰蜀主繼曰崩杜陵詩史何  
足責非惟作者要三長論世知人須特識晉書三復忽解頤  
宣帝紀中乃有賊

六月七日寓園四負堂展祁忠敏公家祭

揚子江頭大風起祁撫不來有辭矣一片輕颿截浪飛中丞  
笑把將軍臂將軍厚顏氣且降敢萌異心如大江三吳亂賊  
誅已盡四鎮沙蟲終喪邦時事日非臣再退燕雀紛紛處堂

輩餓骨甘爲西土蕪缺甌又報南都碎中丞別墅鑑湖濱負  
負頻呼亾國臣豈意方塘一勺水照還天地照君親紗帽緋  
袍秀眉異年少依然舊司李可惜袁隗墦馬家枉招梅福居  
吳市若使蕭何轉餉回小朝司馬相公來大權訓注應歸削  
私釁甘凌敢鬪才漏舟焚屋眞堪笑一死心明祗掌道朱鳥  
人號劉念臺黃金賊拜倪鴻寶玉女金童俎豆香瑤臺十二  
水中央江城五月誰吹笛惱亂梅花鐵石腸

陽湖感懷存師

毘陵驛口柳青青重過師門涕淚零萬里風花人荷戟一山  
春草鬼尊經閉門自續遼陽志伏闕訛傳座右銘腸斷彭宣  
今白髮後堂絲竹不堪聽

平樂譚侯于鳳山之麓建朱吳二忠祠屬余作碑紀詩

四首

地爲宋五賢祠故基

元戎折檻漢庭朱，都閩延陵上國吳。  
握印老拳猶透爪，銜刀熱血不濺須。  
邊關近報妖星落，破冢宵聞鐵騎趨。  
手拓河陽花滿縣，丹臺碧樹照城隅。

瑯戈南下掃鯨鯢，秦棧高懸咽鼓鼙。  
殺氣雲纏龍虎北，歸魂月叫鳳凰西。  
狼暉赴敵真強敵，萇叔違天稍執途。  
張許卽今同廟食，惜無大筆借昌黎。

蕭條異代恰同時，一體忠魂俎豆垂。  
羊杜風流餘涕淚，鄂襄酣戰想英姿。  
人哀黃鳥田橫鬼，哭青燐余闕祠。  
畫壁弓刀看自動，堂堂浩氣激須眉。

名賢遺趾百弓寬，片石堪尋古井闌。  
落日猿聲迴楚峽，清秋螢火點蕭灘。  
銀河正洗天山甲，玉壘初辭漢將壇。  
聞西域已平老

我方依平樂監高歌鏡吹定樓蘭

用傅介子事

二月將盡中宵風雨尙聞雁聲感而有作

蚤見前村雙燕飛汝今何事尙依違不應水際蘆花盡飄泊  
江關竟未歸

一曲琵琶怨淚零弟兄都去短長亭可堪暮雨蕭蕭夜獨抱  
青琴枕上聽

曉起聞鶯

幽人起常蚤步履向前楹翠竹數百个黃鸝三兩聲茶煙逢  
石慢衣露入花清坐愛謫僊句愴然聞鳳笙

病後雜詩

方病無病容病後腰腳軟意行咫尺地疑有千里遠階前折  
瓶花拂襲氣先喘退息綠蘿陰閒凭蒼石蘚延緣歸臥榻瑟

縮蠶裹繭中空思舖歎到口乃憎飯春風吹簾帷時見晴絲  
卷妙哉造化心與我共流轉誰貽特健藥還理故書本

秋懷

生涯安穩是清貧逆旅蕭條愧此身多病自然思返里窮途  
不合久依人虞翻體骨終難媚陶令詩篇只在真閒倚山窗  
看秋色一番風雨一番新

己丑秋寓昭州之珠璣巷主人蕭姓庭有黃皮果一樹  
坡公詩野果名黃子此其是已題曰黃果山房

黃星錯落碧雲高野果垂垂結屋牢病客猶能賦梨樹主人  
不用伐櫻桃西天眼試支郎慧南海珠傾石尉豪待與坡仙

廣詩品安排紅荔鬪分曹

明詩綜載廣州諺飢食荔支飽食黃皮注荔支鬪飢以黃皮解也是

亦蔗漿之干櫻桃矣

亞聖廟天震井恭紀

并序

古傳三氏井孔母井在尼山顏子井在陋巷獨孟井  
無聞康熙壬子不雨而震殿前地陷井出或古寔有  
之是未可攷要之百世之澤存乎其間可仰止也

大哉三井孔孟顏陋巷一派宗尼山此井得之二千載于象  
爲震天所頒自從衰周更列國處士橫議爭叩關瀾翻恃此  
三寸舌敢于大道相譏訕天生名世必有用昌明聖教躬轍  
環七篇作述光俎豆木鐸可以興貪頑至今門牆照鄒魯施  
設規矧窮婁般小子南來最樸鄙下車趨拜禮所媿升堂仰  
瞻日月角冕旒秀發珠瓔鬢三遷母訓寔姒嗣一位公爵仍  
周班古碑高立秦漢上大樹遠自春秋還樅皮中開科斗出  
藤筋上走蛟龍攀殿前一井橫釳砌赤文綠字落剡斑摩挲

巨禍攷厥始始知神力開幽溽青天無雲出古異平地火孽  
雷霆殷須臾直下幾千仞空闊大可容車轆爾時聖裔刻之  
石我明其義非險艱聖人功不在禹下膺懲邪辟同荆蠻異  
端爲害甚洪水決排而後加防閑狂瀾力迴障百世浩氣善  
養充兩閒此井淵源本洙泗遺澤所在長漩灑泰山巖巖對  
道貌驅除井怪恬神姦江淮河海悉來會化作時雨周塵寰

寓中坐雨

節候驚蕭瑟江關歎滯淫殘鐙搖客夢苦雨逼秋心繡蝕青  
銅劔香銷綠綺琴牛衣都在篋何處急寒砧

阻水

小駟愁掀淖長髯數問津雨溪河在路鞭急馬看人雞酒論  
前事枌榆賽近鄰狂瀾隨地有俯仰一酸辛

感懷

北望燕臺壯志遠長歌一曲鶴南飛  
尊前遮莫無青眼篋裏公然尙素衣  
松菊田園容我住滄桑情態幾人非  
行囊賴是黃金少欠買三分白髮歸

病餘短鬢欲星星趙瑟秦箏不忍聽  
大野火雲千樹赤小樓江雨一燈青  
感懷人物思河朔極目山川壯性靈  
幾度停鞭莫惆悵茫茫今古祇浮萍

鞭絲搖曳對斜曛風景蒼涼路不分  
拔劍嬾吟窮鳥賦挑燈私艸辟蝗文  
一天夜色昏如霧萬里河流響入雲  
歸去尙餘豪氣在且欣歌哭有同羣

謂二雲

欲焚筆研重裘衷常恐庸流笑不才  
十載文章三黜柳半生心迹一枝梅  
未容綠雪子堂垂垂老難免紅塵得得來  
枕上



邯鄲留夢去不須雞唱苦相催

小樓望桂林諸山作歌

萬山合沓東南傾勢若渡海奔長鯨東嶺已伏西爪起盪盪  
劒戟森枝撐山頭盡作波浪狀半由海氣所鼓成巨鼉昂背  
鰐鋸齒瑣細蠡蚌紛角爭氣所不滿穴孔出日光穿漏開天  
晶亦如人身有藏府蟻缺百弊叢而生要其變幻不可測就  
石論石非聰明試登桂嶺最高處一覽可以吞滄瀛我居小  
樓至迫偪乃在桂嶺東頭城獨秀一峯枕屋脊四周嵐翠相  
交并金支翠蕤卓天半雲旗閃爍羣僊迎羅浮左股鎮在下  
浩浩平地天雞鳴天寒地坼雷電凍不然聽作嬰兒聲重灘  
隔絕三百六飛臂欲掉猿狖輕靖潛珠殿宿狐兔顏延之臺  
亦久平世閒何處非海市目所飽涉了不驚倚花踞石作冥

想以我自適爲元精新羅一息八十返包舉泰華聯嵩衡天  
窮人戾兩不與余方萬里朝

帝京安得胷中雲夢一吐出化作蠻荒時雨蘇春耕時方冬旱

宿睢陽張中丞祠祠方落成題壁四首

錄一

須髯奕奕齒疎疎想見登臺殺賊初百戰關河終不失兩家  
子弟果何如每於架上披唐傳重向鐙前讀漢書今日蠻荒  
瞻廟貌風雲猶自繞淮徐

竹坪翁有詩送余北上依韻奉和卽以道別

一編雞棲賦載馳病餘王式悵歌驪空存馬骨嗟何用重畫  
蛾眉恐未宜紅襲熏香非宿昔黃梁炊夢已多時參差莫笑  
高陽侶曾有風流在習池

松圃先生惠晚菊一盆賦謝

千紅萬紫集頤堂頤堂二字宋太宗御書一種嬌黃占晚香老圃人如

周柱史殘年花亦魯靈光來從脩竹珊窗底小珊窗館留伴疎梅

紙帳旁見說此名延壽客故應分我起膏肓

### 絕句

鐵甲菠薐鳴脚葵酪酥肥大配蹲鴟病夫第一開脾事飽看

船人健飯時

松圃翁贈晚菊尙豔鍾生送春蘭已花姜秀才致紅梅

水僊盛開寓中山茶亦紅白齊放園丁復購得細梅

兩盆掩映階砌元旦傳坐飯罷詩以賞之

草堂不用赤靈符微霰難銷病客須未免有情思鏡聽卻嫌

無力飲屠蘇綏纓稚子儀加蕭花朵荆妻貌忽姝蘭菊茶梅

紛滿眼誰來寫我歲朝圖

正月三日答秋槎除夕見懷

五十四年同一夕，怱怱過去無還日。惟有年年除夕詩，帶酒燒之灰不滅。去年冷坐梅公亭，三更唳鶴無人聽。今年卻返訾洲權，斗酒隻雞窮祭竈。故人秩滿河陽回，上官署尾稱奇才。椒盤影裏懋馬動，意氣直拂黃金臺。作詩遺我歌莫哀，我歌一聲花四開。左顧淵明菊，右揖和靖梅。水僊起舞翠鬟亂，杜蘭萼綠紛相陪。海紅美人朱兩顙，含笑手進葡萄醅。黃雞一曲玲瓏催，君今不醉何爲哉。想見高齋椽燭竝，孺人稚子團圓飲。二分絃索短牆空，用君舊句收拾奚奴百囊錦。春風三日楊柳天濛濛，細雨飛瓊筵。綠波青似詩人眼，看載繁花上畫船。時余將挈眷上桂林

戲詠舟中食物

繡羽花冠乍養胎撒鹽拋水著燔煨百枚奚止千金直曾獻  
臺城老佛來 雞子

一甌嫩綠滑蕪絲正是桃花淨盡時解道閭閻無此色總緣  
滋味長官知 菜蕪

舟中漫興

一首新詩一曲灘 用都僧施事 愛看春水獨凭闌遠遊不改靈均

服小樣偏裁子夏冠瓶裏落花無蝥劫舵邊遺粒有魚餐誰  
能攜得驚人句嘯向青天起鳳鸞

雨夜讀青蓮集

窗竹蕭蕭風滿門黃河東走落昆侖煙雲本自無心出花月  
何曾有意存慷慨半生游俠氣逍遙千載酒人魂夜郎道上  
行吟去淚灑英雄善報恩

旅齋閒興

有鳥名訓狐，日夕屋角泣。家人顧余病，呪用方書術。彼禽則何知，氣至自鳴息。春風吹簾幃，綠草飛蝴蝶。小婢午飯餘，趨事有喜色。拾粒散林雅，嬉戲亦其德。

雜詠

呼龍耕瑤草，未必成神仙。云胡射利者，乃驅鴉種煙。雞鳴偷度關，勝獲珍珠船。根苗始呂宋，枝葉紛蔓延。鉤人若露萐，墜人甚飛鳶。吾黨有小子，無端染熏羶。如入鮑魚肆，久之變蘭荃。層垂碧藿紫，膊聳鷓鷯。肩徧求白獺髓，枉吐饞蛟涎。偶聽輿人誦，得之駟僮傳。是名倭芙蓉，鷲粟花紅鮮。洋狙具五毒，紫苞爛田田。河車九蒸曬，丸泥百陶甄。解之匪葳苳，仍用罌殼煎。盧仝七椀茶，兩腋風飈然。皿蟲雖盡殺，木腐骨不堅。寄

語紈袴兒慎旃尚慎旃非鳩能毒人自毒何尤天

善哉解溪翁不錄疑雨集謂其詞訓淫青衿易惑溺隨園喜  
俳諧操戈與墨詰長蘆綜明詩次回亦選入我觀與風懷粉  
黛恣塗澤玉溪詠錦瑟何必搜故實笑彼詭癡符瑣瑣加賤  
釋俞國琛文同郭注莊義取蔡繩息目被前人瞞心緣邪思結  
盡芟鄭衛詩忽起膏肓疾

陳德調

字鼎梅義烏人嘉慶辛未進士  
官衢州府教授著存悔堂詩草

雜詩

物生天地閒致用各有適  
鰲牛逐狡兔不若韓盧疾  
插花用樊圃何如樹荆棘  
鵬搏九萬里鷦鷯一枝給  
人人盡夔皋誰爲事耕穡

騏驥伏櫪時駑駘笑其側  
及其遭伯樂賦粟日一石  
被以錦

障泥絡首黃金勒將軍未出門風雲已超忽生愿萬里程死亦千金骨

桔槔歌

圓其軸方其腹轉以機運以足烏鵲銜尾聲噢伊渴龍倒吸銀玻璃鹿盧得勢轉逾疾飆輪欲飛水直立上田下田膏澤平隴頭咯咯田雞鳴田水乾桔槔起一斛靈泉一斛米禾稻收桔槔歇農夫之慶我無力是何丈人漢之陰自謂抱甕忘機心豈知聖人制器利萬世大巧原非任私智陸任車牛水造舟結繩治窮必書契抱甕人將何濟

湯雨生懷僧圖

留衣贈帶自何年久隔音塵亦悄然空向馬蹏拋歲月那從鴻爪覓因緣金繩羨爾修生佛玉局慚余學散仙一十九家



雲水闊寄懷無地託毫顛

李載懋

字惟修號慎堂永康人嘉慶辛未進士

七夕

盈盈一水作重關烏鵲橋成可往還  
今夜人間羨牛女來宵  
牛女羨人間

郝

蓮

字青門號飯山錢塘人著說餅齋吟草

杭郡詩三輯飯山工六法山水人物並極精妙尤長于琴別著飯山雜錄與德清房琴浦楚桐同里俞葦香士槐張薛莊依仁相友善

何與

何與秋風事青霜入鏡飛泥塗蚯蚓笑  
雨雪鳳凰饑歌竟看  
長鈇年來惜布衣江湖空自闕懷抱  
向人違

有感

秋水芙蓉劍空山霹靂琴百年知己淚一夕故人心明月關  
河遠相思風雨深高臺自今古結客在黃金

塞下四首

帝闕遙頒白虎符嫖姚千騎出飛狐譚兵夜帳揮如意躍馬  
秋原撚僕姑塞上胭脂俱屬漢江中波浪欲吞吳燒痕不盡  
檳榔樹畫出西風百戰圖

自古乾坤幾戰爭長安眞可作棋枰渡河虎旅風吹馬破敵  
龍沙雪洗兵誓並山川同賜券功崇劍履不稱名萬方事定  
銷金甲乞與平田買犢耕

旗亭醉月夜徘徊誰識歸休漢將材一任浪傳諸葛死翻驚  
單騎令公來雲屯絕域銅標在風掃狂氛玉帳開此日向留  
青海箭無人夜過李陵臺

秋風颯颯大星危餘孽還驚上將旗戰士早期尸裹革人生  
 死幸豹留皮雲臺刀劍須眉壯錦里祠堂草木悲獨有杜陵  
 湖海客掉頭殘照讀新碑

趙之琛

字獻甫號次開錢塘人

杭郡詩三輯次開出秋堂之門嗜金石文字為阮文達  
 樵栗積古齋鐘鼎款識刻印神似曼生集浙派之大成  
 好事者彙為補蘿迎室印譜人爭寶之兼精繪事樹  
 石草蟲致極生動晚慕禪悅青豆赤華輒留翰墨

丁酉端月偕章次白過孝慈庵用偃亭禪師夜過半畝

居詩韻呈青雨上人

落日照城陰煙樹覆茅屋阿師坐高堂焚香愜幽獨清興發  
 清吟散筆寫散木几案淨無塵胸懷虛若谷我來避誼囂對  
 此稱快足莫嫌半畝寬世界藏一粟

武洑莊

字雙生仁和人候選州同箬朗吟仙館詩草

送蘇印人旋杭

送子回南去秋風正授衣青山隨路遠黃葉帶霜飛別酒愁  
堪把家書醉嬾揮江鄉莼正滑恨不與同歸

蔡紹周

字步濂號藕船仁和人著怪吟雜錄

杭郡詩三輯藕船澹于榮利好栽花飲酒初居江干遶

融回之尾著述盡燬後居東城嘯歌自得所刊怪吟雜

錄二卷皆滑稽家言

春日同人過山舫看新綠小顛燒筍餉客紀之以詩

春雨初收氣轉温晴沙蹋盡見籬門石邊煙裊山廚碧戶外  
雲歸竹閣昏大好詩人參玉版何妨佛子倒金樽爲看新綠  
題新句結夏來尋舊墨痕

鍾大源

字晴初號翁谿海甯人著東海半人詩鈔二十四卷

阮元序略鍾生箬溪幼籍華資壯抱沈痾其遇益遭其  
志彌厲彥威半丁歎此才之不易故生七發惜有術而

莫療

查揆序略著溪武亭妙裔記室名家江文通大是恨人

李長吉居然才子歌以當泣窮乃工詩語其位置在松

陵偶和之閒相彼體

拔乃都官清麗之格

易鳳庭序略窮谿先生海昌詩人抱不羈才未獲世用

因寓意於詩以寫其悲悶旋以病廢家又貧自是閉門

不問得失詩弟子之請益請業者就牀頭口授之傳詩

既廣名噪一時薦紳才士聞聲向慕數百里外詩筒來

絕不

吳衡照曰晴初詩工整

圓愜在香山松陵之間

### 西漢定陶共王陵鼎歌

漢家孝惠踐炎祚封地既削聞梁王隆準子孫就藩位惟恢

實始膺雄疆詔諸郡國立高廟俾奉尊卣歆烝嘗定陶之鼎

亦其一繆篆二入銘都倉長陵草沒井火熄舊物淪落無何

鄉僅從博古認款識鐵官鼓鞴空精良今茲古鼎製殊樸範

自何代來何方通高七寸器殺半蓋疑孟覆形圓鑄三環列  
非一峯卓兩耳峙並三足強雷紋篆帶品莫定六夔三犧名  
難詳西漢陶陵字可辨供廚好時應相當中丞好古識精審  
遠父南仲均慚惶定爲其王陵祭器扶風共祀逾千霜未入  
宣和舊圖錄形質一一煩衡量累黍相差篆畫別知非初載  
升馨香其王諡同名則否孝哀往事殊難忘傅氏昭儀後宮  
最誕毓龍種看騰驤三駮舊國藉屏翰維城誼篤非恆常況  
復承華嗣主鬯材藝素負夙德彰身嗣前星表環極子承景  
祚誇當陽推親典並顯尊重報功事與追遠長想見順時潔  
粢盛斯鼎長奉園陵旁獨遭新莽覆公餽太阿倒握權勢張  
奏貶尊號及帝母天家骨肉情殊傷竊懷璽綬事烏有妄以  
私怨憑黃腸穿瑩竟忍遣謁者發邱恍已添中郎金盃煙銷

土斑駁寶衣火化雲蒼涼休訝魚燈照夜密空憐燕影銜泥  
忙高豕崩隕百物毀眯眼惟歎荆榛荒流傳此鼎獨堅好不  
隨劫倏歸蒼茫愛等周家虎彝度珍同虞氏雖敦藏莫問鄭  
邢暨妖嬪漫稱雕豆兼玉觴所惜銘辭異器蓋雄鴛仿佛離  
雌鴛何當更覓吉金偶珠聯璧合增輝煌生砂活碧敢褻視  
西京法物留滄桑總然得一亦已足寶氣上燭浮雲光絕勝  
汾陰禋祀畢長淪彝器波湯湯

雪樵素山晴巖讀黃九煙唐詩快有詩索和

忽擊唾壺碎殘編曠代餘古今才有數天地意何如浩劫青  
山老佯狂白髮疏蒼茫懷略似九煙晚號略似攬卷亦欷歔

萬丈光芒在千秋筆墨靈高歌中夜發醉眼霎時醒杳渺成  
連曲蒼涼屈子經遺音最相類吾輩不堪聽

汪義婦殉夫詩

婦德古有四矢節已足重矧殉所天難義烈益驚眾嗟嗟汪氏婦救夫事堪痛大廈遇吳回舉室紛逃闕夫病椎牀呼欲速不得縱婦已冒炎出回顧迺號慟夫危脫不拯雖生復奚用返身向烈焰恨不駕飛鞚豈知祝融威似驅人入甕諄諄出出中焦爛兩人共骨朽聲名香見者爲心恫千秋共伯姬庶幾堪伯仲

讀宋史雜詠十二首

點檢威聲已自隆黃袍忽著太息慙欲知禪祚分明意詔紙原來出袖中

忠孝涪王繼統才遞膺神器孰嫌猜可憐三晉旋師日富貴何曾共保來



決策澶州仰寇公竟憑孤注息兵戎後來三黜如償博未有庸人不息功

西祀東封計本愨茂陵遺稿信無慚平生解笑王文正博得君恩酒一甌

虛名曲學枉紛譏汴宋基圖已暗搖說與臨川王拗相不徒苛法在青苗

洛蜀名賢品軼倫一時慕義有安民憑誰再訂元符籍子厚何顏列黨人

上清宮殿接天都璧月珠星協瑞圖聞道道君親受籙不知可有辟兵符

關中轉戰捷熊羆題柱雄心未可疑畢竟魏公緣底事不教長卓曲端旗

三字爰書慘不平大功一旦壞垂成山河帝自安牛角那得窮荒馬角生

冷笑平原策未良偏安事業總荒唐貽羞聊勝秦長腳奉幣年年益寇糧

懊惱平章賈八哥謀人家國竟如何半閒堂畔秋風早蟋蟀聲中鐵騎多

海天風雨螫龍愁趙氏山河付一舟太息文山文信國空餘正氣耿千秋

邑廟災 悲鄉愚佞佛也

自來邑廟非禪宗生民保障資神功黃冠欲併衲衣利謂佛感應神原同人能神前大念佛更當佑爾福爾躬鄉愚深信入骨髓每月六日來懂懂典衣質釧亦不惜香儀謹貯筠籃

中麥稗用代珠百八手輪口誦明虔恭黃冠嬉笑日膜拜收  
錢拔燭何恩恩尼姁酒姥託親串拉邀酣飲開房櫳腥羶既  
飫慾壑滿與博徒博稱豪雄王子正月之六日一年念佛期  
初逢人如山海作鼎沸男婦老幼兼孩童南謨之聲喧未已  
雲房東角俄熾熾黃冠驚叫火大作萬人逃命嗟倥偬爭先  
覓路昧向背閉門惡少何頑凶拔簪攬履恣攘奪可憐科跣  
兼蓬鬆以人擠人足踐足腰膝腹背相揪攻力衰仆地起不  
得二十餘命魂隨風死生片刻等夢寐人散方訝屍橫從是  
時火息念佛止但有號哭聞蒼穹子認母兮夫認婦婦悲姑  
兮兒悲翁昇歸草促就埋斂陰颺颺愁雲濃嗚呼死者豈  
有罪惑於邪說成牢籠賈禍適以乞福故爭如安坐隨窮通  
獲善果在誦佛號呼天亦得登天宮逝者不作後可鑒願事

紡織勤耕農慎毋認作大解脫猶然念佛甘昏蒙黃冠惡少  
厥罪匹辜逃此劫堪椎胸長官遇事善摘抉茲事卻忍稱盲  
聾行當一一伏冥法神威正直兼明聰

論印絕句十二首同松靄夫子作

斗檢封形節璽沿代深莫覩字蜿蜒冶銅刊玉多私記不信

猶居秦氏前

周之節璽漢之斗檢封皆官印衛宏云秦以前民皆佩印金玉從好則私印亦由來舊矣

繆篆精分大小痕相斯史猶藝專門敢啗刻棘雕蟲技古意  
還憑鐵筆存

出土瓊琚色射眸爭看小印馬卿留摩挲欲作囊中祕可惜

烏銀少一流

余於江右見舊司馬相如小玉印玉色嫩黝真漢時物惜無力購之

章摹漢壽古堪珍響擗篔簹葉葉新勝佩黃神越章字入山

百步虎狼馴

秦中石刻畫竹上摹漢壽亭侯印相傳關忠義所繪縣之祥邪

六印曾聞海嶽誇背形兩已不天斜維摩詰畫閒來展火正

何年玉重割米元章畫史云余家最上品書畫用玉印六枚

章印米芾氏以上六枚白字以此印者皆絕品近余偶

閣右丞山水卷見有火正後人陽文印又在六印之外

佳凍桃皮色淺紅庚庚橫理截肪同待鑄鐘鼎離奇字誰是

錢唐薛尚功余師程雲巖蓄印石最富尤愛凍石曾語余云

吾所購石常台如薛用敏者刻作鐘鼎篆為佳

三橋名較雪漁高玉筋神餘秋兔豪後輩許容程皆絕妙

幾如刻髓用蘆刀

秦田水月語原精隱卻青藤舊姓名尤愛和州文學博楚騷

一語似天成徐文長有秦田水月四字印隱其姓名文

休承有印曰肇錫余以嘉名尤為巧合

成句彫鏤巧不停半閒作俑舊曾聆何人更悟詩中畫幻出

乾坤一草亭印刻成語聞始於賈似道余見友人一

印章脂藏少陵詩句巧而近於陋矣

艾碧砂紅色色殊勿論象齒與犀株晁克一王球姜夔趙孟

類  
當時譜可有圓勻徑寸珠新安汪氏收藏古今官私印甚多刻有飛鴻堂印譜錦囊印林

諸種并於巨珠上鑄作篆文以補諸品所未備

半似規員半矩方模胡漢篆更秦章黃金斗大渾無羨奇樣

新傳古瓦當近人刻私印每尙秦漢古瓦當式而差小其製

陳生年少學鷗波遺蹟銅香書屋多免續印人他日傳品題

直比櫟園過同里陳寅仲詩翁誰園次子也工篆刻有銅香書屋遺印譜一卷松鶴夫子序之稱其蒼潤秀

勁雅似子昂誰翁曾屬予題詞

題楊忠愍公獄中貽鄭端簡手札真蹟爲免牀文作

從古奇冤甯有此忠臣竄名邪黨死九閻杳杳叫不聞枷鎖

風香赴西市空傳遺墨出狂狴鬼護神呵留片紙使筆筆如

鐵想見先生受杖骨落墨墨有痕想見先生擱斷筋書成慷

慨欲誰寄南都主事康成齋不及漳州忠節公獄中尙有平

安字延陵好古今無倫購之仍貽鄭後人忠魂浩氣兩凝結  
奎壁中天萬古新我聞同時首奪鈴山魄抗疏東陽沈公鍊亦  
人傑可憐片牘併無傳一讀欽礪一皆裂

鐵硯歌爲陸丈冰菴參軍桂作

丈游滇南時于市上得鐵硯形橢而方闊僅踰寸背  
有蒙古篆回不可辨鐵色純黝真古物也丈匣而珍  
之索余作歌

點蒼山裂黑蛟鬥一蛟墮地蛻骨瘦土花千載齧不得化作  
吉金堅且壽何年巧匠斲作硯形類孟方墨痕鏽古器自有  
神物護未遇其人不輕授士龍先生有硯癖拜石老顛此其  
又往者曾作滇海游闔市瞥驚奇物觀精鏤有光冷射面疑  
是麤賓躍波後摩挲一笑呼陶泓扶寸烏銀誰鍊就卻有四

字銘厥背畏吾兒書難句讀得非晉代張壯武賜物千秋欣  
邂逅抑或南朝桑狀元磨之欲穿穿未實傾囊不惜買之歸  
匣以琉璃置懷袖游蹤萬里半天下鎮日隨身相往復雅稱  
先生一枝筆鐵畫銀鈎紙背透榻來過我出相示入手鏗然  
指微扣無鯁魚血凝作邊奪羊肝色滑不溜迴非水瀘汾泥  
澄渾訝石破秋雨逗先生寶之良復佳一稜田堪子孫耨濡  
以筆公磨角尖研以墨侯磨丸皴紅絲紫玉銅雀黃一例無  
能出其右何必處仲鑄如意擊缺唾壺作龍吼何必歐冶鑄  
莫邪一道白虹閃晴畫鐵中錚錚乃屬爾不沒泥沙傳宇宙  
先生借爾署作字洪崖君名合嫌陋先生愛爾度以室七客  
寮同鐵史構先生一號鐵硯生硯得先生硯亦喜矢鐵石交  
誼良厚更勝君家老放翁微凹心太平菴舊



潘鴻謨

字陸鵬嘉興人著小餘香詩鈔六卷

吳展成跋略陸鵬性吟詩不宗一家而筆情綿邈饒有風致

弄珠樓

樓臺圖畫臨無地山水東南擅勝區  
葉葉漁舟歸別浦村村煙樹接平蕪  
檻招黃鶴憑吹笛潭臥驪龍穩戲珠  
誰更沂流清興發吳歛一曲入菰蘆

惆悵詞

游絲飛絮舞晴空一段芳愁駘蕩中  
我惱春光春惱我欲憑嘯鳥問東風

朱佩蘭

字怡谷海鹽人

家傳略公少工吟詠富著述孤芳自賞不求聞達吟朋詩友中與吳上舍應和最稱莫逆

長安道

長安道塵如埽車輪日夜催人老消魂橋畔別離多柳條折  
盡無芳草天涯遊子戀名韁忘卻風光故園好

范

錯字聲山賦白舳鳥程

縣志錯有雋才工詩善詞留心掌故客蜀

著蜀產吟寓鄂著漢口叢談皆不愧作家

朱綬序略范君為人如閒雲孤鶴翛然塵壒之外生平

足迹半天下荆門巫峽三湘九疑登山臨水感物懷人

皆以自寫其襟抱詩古體以質健

勝今體以明鍊勝言所故言而已

緝雅堂詩話白舳一代雅才嘗有吳興藏書錄蜀產吟

感逝吟續漢上題襟集茗溪漁隱詩稿茗溪漁隱詞稿

幽華詩略等書今焦山書藏尚存印本多

是陳雲伯製序其溇溪紀事詩尤有名

臺灣三仁祠詩  
壽從事名同春浙江諸暨縣人年七十二佐臺灣淡

程死之從事糾義民復其城隍請攝丞事明年十二

月隨官軍進駐烏牛欄逼賊巢遇伏馬蹶被執罵賊

死事聞李義士劉烈女與焉

可行道下... 卷之二... 范... 錯

海風吹動妖星芒淡水境外多封狼郡丞死官丞印在丞客  
 佐丞心激昂客年幾何七十二激厲郡民矢忠義孤城保障  
 同巖疆此是東甯乾淨地經年苦戰賊未平客年雖老志請  
 纓丹心白髮照天地居然海上為長城深入遇伏罵賊死自  
 是人閒好男子千秋廟食重三仁入幕之賓有如此

李義士

名喬基廣東嘉應州監生林逆初亂即在彰  
 化練勇堅守鹿仔港與官兵為聲援丁未正  
 月檄調隨軍進大里塹攻西門焚竹圍賊發礮石相  
 距我師不克二月二十日復至牛馬莊追剿被執磔  
 死

男兒忠義無資格李生隔海遠為客揭竿驟起眾心搖多少  
 良民遭賊脅生慮賊眾剪滅難毀家紆難開軍壇百戰守險  
 以待大軍至一介之士乃與諸將同心肝奉檄從軍頻殺賊  
 慷慨捐軀終報

國海南明月海東雲如此英靈宜廟食

劉烈女

名滿姑臺灣郡丞劉亨基女丙午林逆陷彰  
比城家人紛散女依父不肯行嗣見父被害

急躍入池中水淺不死賊引  
之出烈女怒詈不止遂遇害

兒女有英雄閨房多節義一死謝君親正氣彌天地君不見  
郡丞之女劉滿姑大家淑女深閨姝海東從宦美如玉問年  
十四纔有餘蟻賊來郡丞死滿姑躍墮池中水不深墮賊  
手取義成仁頃刻閒罵賊全貞名不朽碧血滿地花斑斑閨  
中乃有顏常山海中童女歌神絃青鸞羽衛從雲囊

施希潤

字小愚歸安諸  
生著小愚詩集

下昂村田家

人家隱垂楊繫纜村童聚宗老出問客邀留過茅宇妻孥亦  
欣然便欲具雞黍辭之不可得相對酌卮醕殷勤話農桑知

爾力作苦十年不相見衰白遽如許兒子各長成已足當門  
戶一生足衣食逍遙在場圃歡言盡滿觴春鳩鳴過午

題畫三首 并序

錫山女子唐素盛年不嫁鬻丹青以養其親蘇州胡  
太守得其花草數紙喜而詠之一時和者數十人余  
亦繼作

太守乘五馬言訪第二泉名泉比逸士高隱青雲邊入山覺  
幽響臨水鑑古顏皤皤一叟來彷彿林中仙丹青奉使君報  
以杖頭錢殷勤相問答嘆息閨中賢持畫歸郡閣濡筆題詩  
篇三吳盛文史吟詠盈瑤箋

有女今不嫁矢志養其親問女胡爲然門戶持無人平生一  
小弟天亾實苦辛父老乏生產何以居長貧賴女善花草點

染無俗塵持此易升斗聊復供昏晨女子不重才至行名豈  
湮疇其諒斯志聞者應沾巾

畫松濤髮髮畫竹影猗猗豈謂非俗好舍之畫折枝冉冉白  
日過盈盈素髮垂欲藉寸草心持報三春暉剝啄叟入門手  
攜香醪歸庭前視桃李紅白開且飛捧卮爲親壽歲歲長如  
斯此際樂復樂慈烏樹頭嘯

長興邢佺山明府重修謝太傅祠墓詩

園碁奔鯨滅攜妓蒼生濟清談佩良規祕書驚綠字太傅沒  
千年風流輝百世賢孫宰義興述祖追往事四尺修墳塋專  
祠展時祭年代闕滄桑牛羊踐古隧廟貌誰復瞻碑碣臥于  
地君子竟道消語見謝靈運祖德詩序過客多感涕哲人懷古心書史  
慕風義稽典令德宜崇祀集賢議俎豆堂宇新窺窳松柏翠

石勒黃絹文功紀東山志轟轟蒼岑高潏潏清溪逝勝事咏

名流絲竹永不墜

沈惇彝

字積躬，號敘軒，歸安人。官江蘇、淮、海道，著留耕書屋詩草。

墨林今話敘軒年三十即官南河，與郭頻伽、汪小迂諸君交契，倡和無虛日。寫梅花得徐青藤、蕭疎之致，尤精墨蘭。有陳古白風嘗集蘇詩題梅、蘭、竹、菊畫幅各十二首。浦上爭傳誦之，著有留耕草堂詩稿。余愛其述懷云：詩畫不工，隨興會科名無分，好文章，天機自到，不事雕琢，如其畫品云：子岱官河上，亦嗜畫。

獨漉篇

獨漉獨漉泥深水濁水濁尙可泥深陷足

解一銜蘆月夜孤雁

何依畏逢增繳寒影自飛

解二飄絮化萍隨波逐浪流入大河

更靡定向

解三空牀默坐清輝入帷客心誰訴明月相知

解四誰

無壯志壁劍風生妖魔暗觸忽聞龍鳴

解五梧桐高樹何來鴟

鴟鷹不輕擊養氣冲霄

解六

治河四章

治河維何順水之性導其下流仰惟神聖醫必問根斯克療  
病溜緩沙停束之則勁

束水有道其權在隄九澤既陂禹蹟可稽河不兩行驅若駿  
騃挾沙東注風掃雲霓

方略率循載之篇牘後靳前潘允宜私淑海口之功惟舊是  
復以水攻沙告成斯速

雲梯關外三百里遙昔時滄海今日耕樵長隄是築急則治  
標棄新歸故

天語昭昭

王

渥

字霑田號亞伶慈  
谿諸生著巢枝草

谿上詩輯亞伶居相山性耽禪悅狀若木雞其於世事  
若漠然無與者而無不通曉好飲酒飲必盡醉年僅三

兩浙輶軒續錄

卷二十七

王渥 王炳業 董詔

三



十二而卒無子有僧梅巖爲立祠於洞山寺中意其人  
周從禪窟中來也著有夢夢錄詹言楞嚴億讀史測蠡

山陰道上

道暑人來鑑水邊越王城外柳含煙兩三牧豎隨鷗浴四五  
漁翁枕槩眠田畔有車牛灌水江村無樹鳥依船經時不泛  
山陰棹草色青青分外妍

王炳業

字琳園  
山陰人

春草

枯榮隨例驗循環吹到東風鬢欲斑一抹淡煙寒食雨六朝  
遺恨夕陽山康成館是何年改仲蔚門常鎮日關腸斷水光  
花影裏江南有客未曾還

董

詔

字芸梅會稽增貢

夢中得霜稻翻雲雪滿匙句沈文子璞以露荷映月霞

成幄屬對因足成之卽呈子璞

蕭疏麕眼菊花籬節物催人兩鬢絲十里秋光黃葉路一溪  
清影白鷗陂露荷映月霞成幄霜稻翻雲雪滿匙百結纏袍  
寒似鐵龍鍾病骨可能支

鄔慕東

字宣猷黃巖人  
著竹坡詩鈔

孫衣言序略宣猷先生未嘗求  
工於詩而興之所觸灑然成詠

寶劍歌

龍泉三尺搖電光秋水一抹凝清霜星精上天薛燭死血暈  
爛爛土花紫烈士報恩心未休攜向淮陰市上遊嘯聲突聽  
腰閒出怒髮沖冠目眦裂截盡仇頭利似風寶鞘玉匣韜寒  
鋒百年神物有呵護掛壁時吐青芙蓉平生負心如有幾石  
爛海枯顙猶泚盟成白水竟蹉跎劍乎劍乎奈爾何

壯心不可展戚戚依衡門秋風動羅袂颯沓來荒村念我平生事慷慨向誰論憂思無所極氣結未能言

山居春晚

深谷鶯嘯日又斜東風吹綠徧天涯夢回枕上數聲笛春到園中一樹花翦翦碧蕪游客路娟娟紅杏酒人家琴絲已斷鍾期杳每爲浮生念歲華

徐

璽

字虎文蘭溪廩生

題蕭山余氏姑婦雙節傳

接武金包勵志堅發幃姑婦二難全春風淚併凝斑竹秋雨聲連紡木棉鸞鶴同孤悲兩世螟蛉再續慰重泉此情若譜霜娥怨誰辨哀音上下絃

吳清皋

字鳴九號小穀錫麟子錢塘人嘉慶癸酉舉人官江西南昌知府著書壺菴詩

吳清鵬曰先小穀兄早歲有能詩文名嘗侍祭酒公游揚凡酬應之篇多出先兄手揚人皆稱爲小穀先生

題宋徽宗畫唐明皇訓儲圖

金甌不惜自撞破負荷乃望後嗣賢唐顛宋蹶等一轍此圖  
卻憶開元年東宮仁賢諒無議七鬯如何驚主器海內爭冤  
殺戾園眾中獨寵憐如意從此君王鳳德衰宮筵別爲洗兒  
開延秋飛啄王孫盡靈武倉皇册使來再造惟憑師武力翠  
華一去還迎入萬歲虛聞擁道呼羣臣苦請遷宮急嗚呼西  
內生還德已慙北轅淪死更何堪試看帝子青衣辱更少宮  
人白髮談自古創垂宜慎始致寇胡堪付諸子時危末造只  
淒然運復中興亦幸耳當時貌此非無因付託亦恐難其人  
如何殷鑒自不悟對此丹青空絕倫

秋日寓園

池館幽如此依然處士家  
亂蛩閒絮草孤蝶下尋花  
客去門初掩詩成日易斜  
惟憐衰柳意搖落正天涯

題宜興李氏三忠事蹟考證後

客魏一禍馬阮繼明祚久數  
桓靈終永明建國僅餘喘  
據海作市徒恩恩殘棋一角  
那可補末著況又無英雄  
巢傾卵破知幾姓一邱狐貉  
隨秋蓬其中風節得三李  
至今化碧干長虹中丞銜  
命始東粵下車一路威黎  
峒星輅宣諭入丹傲方物  
遠貢來蠻蠻羣姦成虎正  
突檻悍將如馬翻鸞弓韓  
盧翼可一噬效印刑惜不  
真王封一州五府自提挈  
天意直欲身彌縫大兵十  
萬踰嶺嶠掃蕩羣醜如撥  
麤青頭一戰鼓聲死隻身  
夜走靈山中投屍久分同  
白馬賣塞但恨如盧龍沈  
池

十步乃死所波濤尚捲厓山風公諱用楫字武舟官兵部侍郎肇高廉雷瓊羅巡撫大

清兵入欽州公拒戰於合浦之清頭營數月未決勝負總兵

萬良吉告以虛實夜引之劫營遂潰乃走靈山自沈于門生

勞貞觀繼公志者有公弟置身早貢明光宮銅駝眼見棄荆

棘鳳池縱到空簪形自辭鸞掖監諸道誓裹馬革膏羣鋒虎

貔屢抗走蠻觸猿鶴倏化隨沙蟲古來兄弟殉國難常山乃

有平原公來字我貽用楫同產弟也起家選貢以中書封藩

死于德是時中原無寸壤小朝託命依安隆孫恩但解辦作

賊驕恣自謂唯其功劫遷始效催犯計禪授潛躡操莽蹤桓

桓御史激義憤趣召西府僉謀同除狼得虎亦權計譬鷗逐

雀無姑容衣帶有詔事不密推刃喋血無遺萌成仁同日馬

場死雷雨晝晦生虛空桃僵李代姓名易海枯石爛精誠通

革除事往二百載一家照耀光熊熊順字廷碩官監察御史

清兵破桂林永明王走南甯時孫可望已得秦封乃遣將迎  
王至安隆恃功驕恣而馬吉翔等復謀書堯舜授受置王不  
能堪公與大學士吳貞毓等以李定國方據有廣西共謀召  
之定國得詔未即發為劉議新所洩可望遂矯詔執公等于  
廷同日棄市今馬場舊碑所  
題十八先生成仁處是也 嗚呼有明末造天所壞元黃血  
戰徒洵洵識時豈不號俊傑久死母乃羞凡庸

聖朝覆載比天地

賜諡一一褒愚忠三臣不幸典獨闕賴有賢哲勤諏調要當  
寬大罔忌諱見聞乃得搜羅供闡幽會見盛典補穹碑他日  
重磨礪

孫

觀字東雅錢塘人嘉慶癸酉  
舉人官山東荷澤知縣

和陶雲汀宮保登雲臺山

華鬢天女非無市花首仙人亦有臺靈藥遠尋三島去名山  
新自十洲來蒼龍閣影中峯月白馬潮聲下界雷便欲更招

麟鳳至

十洲中有  
麟洲鳳洲

乘風長嘯亦悠哉

星辰四壁手親捫八翼靈徵幾葉孫久以經綸拯飢溺更將  
文字闢蒙昏觀于海者今槎客若有人吟古羨門絕似幔亭

高讌夕賓雲法曲奉金尊

龍門壇坫幾經年白也詩情勝浩然河海安瀾千里軌淮揚

被澤萬家田心如陽谷初生日夢到資江夜雨船何日重游

更重賦好音還向下風宣

彩鸞軒裏烏絲格黃鶴樓頭玉篴聲山海登臨原勝事賓朋

吟讌亦遙情記從鄒嶧求遺篆曾向之采掇石英經歲蓬萊

高閣上幾回南望賦遐征

趙

泰

字心蓮錢塘人嘉慶癸酉舉人官平湖訓導

楊振錫日心蓮先生文章一宗理法生平剛正不阿司訓富湖遇諸生有委曲事力周旋之居恆廉潔卒無餘



資諸生經紀其  
喪歸櫬里門

武佑將軍廟 廟在蕭山縣北幹山中  
有劉文成所撰廟碑

廟貌巍峩向夕曛居民爭說厲將軍 神姓厲名高松百尺飛

靈雨古磴千盤入亂雲遺恨未能終霸業 神與項羽起事山  
陰功不竟而卒

餘威猶足靖強氛 會稽志載方臘陷錢塘欲東犯會稽  
見將軍環金甲陳兵西與賊不敢渡 英姿

凜烈昭然在社酒年年薦苾芬

鍾鴻慶 原名少錄字懷叔號補佛  
錢塘人嘉慶癸酉舉人

映壁庵尋南宋梳妝臺遺址

山僧渾不管興亡領客尋幽到上方但愛林巒新卓錫那知

臺殿舊披香露花尚學朝勻粉璧月曾窺晚卸妝果有燕支

被芳野年年草色染斜陽

沈元熙 字沈樓海甯人嘉慶癸酉舉人著沈樓詩鈔

杭郡詩續輯沈樓抱如愚之質年十七未解經義憤然  
奮厲寒暑不輟業一旦豁然後以應試卒于京師年未  
五十也里有廣孝葬會幾廢矣賴其言事復舉收養棄  
嬰營乳育之費嘗質衣以爲倡率其勇於爲義如此  
趙烈女詞同里趙旣明女字蔣汝梅未婚聞汝梅計誓

于蔣合葬時嘉慶元年八月也

薄俗良足歎失身弗自惜當死而不死丈夫愧巾幗堪羨東  
鄰女貞心踰磐石磐石猶可轉妾心無可易生未識夫面足  
未踏夫宅非爲節烈名千載垂竹帛非爲身無依夫死飢寒  
迫惟以死殉義何暇籌他策善哉生者謀能令死者憚一棺  
歸夫家黃泉其窀穸秋風動寒林霜月照清夕月照林棲鳥  
雙雙疑女魄

題蔣村草堂圖

嵐翠落庭陰幽居愜素心百年喬木古三徑草堂深舊雨聯

吟榻新詩重藝林何時一樽酒容我訪江潯

俞萬逢 字樂郊海甯人嘉慶癸酉舉人著塔影書屋吟稿

杭郡詩三輯樂郊斷句如秋柳云關山落月人千里原  
照寒煙水一村霜花箬色折籬落風物關懷舊板橋秋  
草云院落時聞疏雨滴池塘容易夕陽多野曠有人  
聞露氣天涯何處不蟲聲筆健語真絕無饜滑之習

次呂幼心司馬贈馬古芸僉判韻

一笑依然落落蹤三年何幸倏相逢交情淡似滌涸水詩句

奇於突兀峰把酒頓增今日量看花猶帶舊時容年來可有

春明夢欲覺如聞打曉鐘

陳昌穀 字似農號子穎秀水人嘉慶癸酉舉人

石瀨山房詩話于穎續學工文讀書勤  
苦雖嘔血不息壽命不長時論悼之

湖中曲

弱楊巖煙弄柔碧小雨霏微杏花白蘭舟楚女春慵多懶逐

香塵度芳陌萋萋綠渚煙絲生沙融日暖花光明歸橈蕩漾  
鏡中行晚樹黃鸝嘯一聲

松寥閣

松寥閣下落潮聲遠樹歸禽夕照明欲假僧寮留一宿開簾  
吟到月初生

沈正楷

字敦行號叔石平湖人嘉慶癸酉舉人  
官廣西上思知州著柘西草堂詩鈔

徐申錫序略叔石先生以名孝廉出宰粵西歷官刺史  
所至以文學爲治豸獬之俗化於弦歌一時稱循良焉

留客

舊交半謝軟紅塵此地相逢有幾人小屋如船聊設席敝裘  
可典且沾春花陰積雨濃浮蓋菜莢當門香滿身明日重三  
天氣好會須一棹泛河濱

自題詩稿後

鏡中懶畫翠蛾眉傲骨猶存不合時自檢錦囊還自笑瘦腰  
如此未工詩

鄭祖球

字受之號笏君歸安人嘉慶癸酉舉人著紅葉山房詩文集

府志祖球少負異才年十四五諸經皆通長益肆力于秦漢古大家文字兼工古今體詩

題管夫人自繪小像

蓮花落盡鷗波冷舊宅淒涼一銀杏斷縑幾筆寫琅玕亭亭  
猶立風前影煙鬟霧鬢儼神仙零落人間五百年我來拂拭  
開生面文采風流總可憐杜鵑啼上冬青樹良人何事蒼梧  
去一行小款認香名娟娟美女簪花處堞來爾我最溫柔惆  
悵王孫不自由白雁橫江天欲暮夢痕飛繞管公樓棲賢山  
下數弓地行吟便有瀟湘意年年芳草數歸期為寫孝思道  
院記竹粉模黏淚未乾餘不溪水鑿清寒幽懷訴與鴻詞客

莫把崔微寫照看

望五老峯

十一匡廬游游山愛推勘目力既已窮峯峯面目換五老最  
雄傑高踞勢傲岸有骨而無肉蒼然天之半或跛倚抽肩或  
袒裼露胛或正襟危坐或旁矚俯瞰一老意孤行垂堂若故  
慢峻極攀猿稀貌古眾山憚獅子山名何猗猗戲旁作嬌憨意  
當媧煉石此獸能吞炭五老乘之來相從閱昏且滃滃春雲  
生咫尺忽中斷譬如羣英會道合復羣散霽然風雲交漫天  
結長幔又疑商山空四皓俱歸漢陰晴各殊狀曉暮耐久看  
意欲躋其顛小子未敢玩上有采樵人觀棋斧應爛

題烏山披雲樓

樓前百尺桐樓後萬竿竹山揖樓左肩水抱樓右足中有雙

龍眼冷冷清可芻何物老嫗來刮之眇一目龍疑有疑無泉  
 一清一濁禪關人迹少有僧頗不俗食我香廚飯邀我虛樓  
 宿不說法談禪而飲酒食肉同行四五人幽棲恣所欲緬昔  
 兩高士結廬此山麓丹鶴翔雲中不能招鴻鵠寥寥二千載  
 誰與薦寒菊余家有谷口棄遺塵網東望古心悄然叻叻野  
 鳴鹿

陳

僅

字餘山號漁珊勤人嘉慶癸酉舉人官陝西甯陝廳同知著權雅堂詩集三十四卷

縣志僅勤於治民所至多善政咸長紫陽安康皆立生  
 祠祀之公餘尤好讀書經史小學皆有撰著最長於詩  
 江開序略余偶至安康識餘山大令會秋雨久漢水漲  
 溢高於郡城內丈有奇雨猶不止夜聞忽訛言隄決民  
 扶攜呼號動天地餘山獨張蓋露坐北門當水之衝靜  
 以鎮之自夕達旦非自信於天安能有此定力且非脩  
 城郭增隄防綢繆未雨郡人之不為魚鼈者鮮矣又嘗  
 游紫陽邑人士愛友誼之敦擊訴編氓之疾苦表窮民之  
 詩家庭之友愛友誼之敦擊訴編氓之疾苦表窮民之  
 節孝無不令讀者欲歌欲舞或歎或泣不能自已他如

懷古紀遊詠物之作大都本諸性情觸處流露而不貌襲前人其典博宏力足以抗衡宋元諸大家而入  
律之細謹寄託之遙深運思之清婉無一不合於唐賢  
絕不蹈宋元人流弊誠所謂博而習  
徐元潤序略餘山爲一家之言者也  
及爲吏絮己愛民獎訓士類如古循良筮仕以來譽不  
容口而餘山益欲然不自足蓋礪然信其爲君子人矣  
又讀其繼雅堂詩集根情而苗言左物而右志其才力  
矩矱森然且皆有爲而作無泛然牽率酬應以求悅於  
人者蓋本其志之正以求其音之雅而粹然爲君子之  
言者矣

### 吳山施將軍廟歌

格天高閣極天起三字獄興國凶矣將軍手提三尺鐵誓殺  
權姦雪國恥雪國恥報天子天子無言將軍死將軍死相公  
生小朝廷上和議成和議雖成相公死將軍赫赫仍如生吁  
嗟乎博浪椎中副車將軍一劍遂徇軀太祖太宗實使我蒼



天佑賊何爲者君不見阿合馬

渡江

安穩春波快放舸長風吹雪滿征袍江流健挾全淮下山色  
青連建業高三楚極天迷積氣雙峯終古壓寒濤從來守國  
憑天險裙屐清談笑若曹

小車行

小車班班何顛連妻在後夫在前兒女五六人飢不得食夜  
不得眠嗥聲啞啞大道邊峩峩高車來江南大賈顏于思猶  
綸織錦無塵埃狐裘如雪光皚皚道旁拜且跪願得一錢救  
一死死亦尋常耳視此呱呱裸中子車歷鹿輪轉轂馬鳴蕭  
蕭去何速隱隱黃埃但聞哭

賈似道玉枕蘭亭歌

蘭亭一百十七刻天府裝褫分十冊深宮捧出賚師臣

見輟耕錄

玉躡金題光萬尺師臣退食何從容堂前含笑催玉工循州  
已去吳丞相狎客初來廖瑩中眞帖摩挲全五字臨池巧倣  
巾箱製點磔戈挑具體微大小雖殊態無異摹鑄幾度費平  
章福華編畔墨花香虹氣定浮多寶閣軍書不到半閒堂降  
表陪臣方屈膝佛狸又草臨江檄習家亭礎峴山碑盡作襄  
陽礮中石此日師臣披繡袞岩堯葛嶺高眠穩官禮鈔完蟋  
蟀經東南縮盡山河本明湖燈火似星浮春日居然曲水遊  
半壁蒼黎空涕淚中朝宰相太風流吁嗟乎太清樓蔡氏滅  
羣玉堂韓氏蹶翰墨千秋自有情誤人家國爾何物南風吹  
散木棉花副本流傳付夢華湖山一覺游仙枕何似偏安司

馬家

騾車謠

綱者驂轅者服行者輪附者輻車遲遲騾苦飢泥獨漉騾躑  
躑到汝芻飯汝豆車不前職汝咎山河高澤何深騾骨出愁  
人心路迢迢行且止往復還幾千里來者今去者昔稅汝騾  
崦嵫夕

魯連臺

戰國策士皆臥狗先生矯矯人中龍圍城談笑卻強敵力挽  
王氣歸之東存亾六國黜一帝事成高蹈臣無功平原公子  
細人耳敢以不義污乃翁頗疑當年射書事或近游說蘇張  
風要知出身爲桑梓舉動未愧端木公荒臺百尺溯遺迹過  
客仰止生敬恭鴻飛冥冥去東海先生往矣吾誰從

官湖橋題壁

莽莽徐州道寒天一雁飛斷雲低下相殘雪帶清沂渡古行人熟村荒候卒稀長征憐老馬且復耐朝飢

江夜

橫風戰歸浪飛雨截孤舸旅夢寒難穩愁人夜獨醒煙痕排岸闊水氣壓篷腥蒼莽趨時意春潮響不停

板子磯

晉陽興甲太無名跋扈將軍意氣橫殿上春燈方奏曲洞中夜火竟移營恩恩灑淚東宮詔草草分防列鎮兵半壁荒朝真自滅江波爲洗劫灰清

新莽銅權歌

莽居攝大誥頒莽建國法周官周官所謹在權量鎔銅作器紛草剏國師秀大夫雄手挈炎鼎身市傭朝爲漢室暮新室

元年正月朔日律石之制成第一  
銘曰律石展始建國元年正月癸酉朔日制第一通  
第字下左畔  
別有一二字  
井田國服從此出君不見天權斗柄高差幾真人白水揚天戈權乎權乎奈若何

### 過古戰場

陰雨屑空天雨泣古血鎔沙作鹽汁黃昏何處起悲笳十萬殘骸霧中立秦時築城截虜臂前人爲怨後人利豈知復自棄長城內作邊牆圖控蔽黃沙撼城城欲平鬼馬踏煙行有聲冤魂夜夜望鄉里牆頭燐火時一明人生有身不厭老誰遣沙場殉肝腦古來苦說爭戰多今日方知太平好

### 獨漉篇

獨漉獨漉渭清涇濁小人得穀君子得祿  
素絲皎皎三入爲纁千夫所指是日禍門

陝州

劇邑雄當隘平岡快倚幹山分嶠塞赤路關陝原青曲坂交  
駢鐸高風墜雁翎似聞周召治歌誦尙堪聽

病骨

二月貂裘冷商聲鼓角中愁心懸戍月病骨入邊風地脈三  
秦盡天光九塞通干將今已缺無事倚崆峒

登興安城樓和王少尉

槐韻

層山夾水路無窮設險依然萬堞雄寒雁聲回秦嶺北夕陽  
影送漢流東民生井絰號呼後劫運滄桑感慨中教誨安全  
兩無術不堪愁倚滿樓風

終南

終南塞西陲天亦苦其大修飾祇一隅餘者任草昧羣峯幾

千萬錯雜迷向背森森巨石立一石一水界水亦無恬波雷  
霆聚砢泮草草位置閒頗似不甚愛中藏或靈異外視但瘡  
疥良材產其上自生終自壞人工日開闢穿鑿彌破碎豈徒  
行役苦耳目不一快形勢縱沈雄有類武夫介垢污矧藏納  
厯世民滋害何不命夸娥移置大荒外千里畫井田免使胸  
芥蒂

楊菱浦

瑾懷

贈定軍山銅蒺藜兩枚因賦長歌

楊子遺我一雙銅蒺藜四角觜觜森棘枝般紅螫手不敢觸  
滿堂殺氣風淒淒古物苔埋千百載樵童掘得街頭賣秋田  
土錦蘊枯菱夜雨金精化獐薑二八縱橫鼠虎逢阿瞞折股  
軍催鋒三分大業一戰定綸巾羽扇何雍容弔伐王師艱六  
出刁斗宵嚴鹿角密十萬骷髏泣古煙鐵蹠橫濺桃花血五

丈原頭星落  
苾祁連高冢  
倚平岡紙錢野廟  
黎毗祭鏞鏃沙  
揚部曲傷蕭條  
舊壘羣靈護桂實  
凋殘漢家樹  
並餉諸葛墓前桂實一器  
匹馬斜陽暗  
不嘶銅鼓聲  
聲振餘怒

過殺熊嶺宋將种師中死事處

傾崖後格肩  
巨石前滑足  
左睇倅立壁  
右睨眩深谷  
老熊不敢嗥  
延頸受飛鏃  
翔鳥匿高景  
恐畏日車覆  
緬思宋金交  
百里國日蹙  
盈廷怯雞  
毘城下盟已  
速不戰遽請  
和青城自求  
辱桓桓种將  
軍奮袂起邊  
族太原吾北  
捍趨援不遑  
宿五戰三得  
勝赤手扼修  
腹豈知地理  
失到此嗟敗  
衄列城已解  
瓦義士空碎  
玉至今嶺頭  
雲彷彿戈甲  
簇殷紅坡塹  
土戰血所  
滲漉懷古望  
蒼茫撫景行  
躑躅英魂若  
可招靈旗午  
風肅

蒲州



百戰蒲關地雄都控帶遙河山連砥柱雷雨起中條大野征  
塵黯西風濁酒消不須尋古蹟蘆荻晚蕭蕭

讀書

讀書欲求靜展卷思紛然堆牀萬牙軸力奮心不前耳目自  
寂歷視聽翻喧闐乃知萬物理動靜分後先恃外以防內厥  
力終不堅作詩禁躁安庶用窺吾天

古人破萬卷而無一字存今人矜涉獵動輒千萬言枝葉豈  
所尙要在尋其根俗士采春華長夜徒昏昏

讀書如飲酒所貴領其趣適性不須多升斗供挹注徐徐涵  
泳之真味日流露臍腑泱神靈唇舌生妙悟狂花與病葉一  
往轉成痼食古而不化徒爲書所誤

瀨行口占示諸姪及同學再疊前韻

西風吹鬢曉霜稀  
小草眞慙出處微  
一命豈難成利濟  
半生久已薄輕肥  
深知窮達由天賦  
終覺迂疏與世違  
有約十年如此水  
拂衣敢待有田歸

來日大難

來日大難當食不餐  
出戶拊心明星闌干  
太行雖高高不至  
天下牀逢人荆棘在前  
松喬千年壽盡亦死  
丹竭芝枯鬼伯歡喜  
仲尼救世周流栖皇  
迷陽曲局取笑楚狂  
隋珠和璧萬禍所兆  
投之濁流以全吾寶  
左有燕姬右有越娥  
今日不樂來日奈何

偈側行

偈偈側側各自努力  
出門尋人歸來歎息

野鹿得草鳴聲呦呦哀彼幽蘭棄之道周  
昔年與君相期千載一夕參商過不在大  
片葉秋墜回風吹之仰瞻高林誰念同枝  
嘗茶知甘嘗蜜思苦志士皇皇一食三吐

艾如張

蘭爲防艾爲翳前者羅後者繫語汝雉汝何不飛去蓬蒿中  
蓬蒿雖低能汝容一朝碎骨血沾臆汝雞啾啾惜不得艾如  
張呼爾媒青葉綠花何所猜文衿繡尾爲汝災

壯士行

要離本細人迎風身則僵一朝自奮發乾坤爲低昂小忍成  
大勇一斷起眾怯蛟龍當其疑赤手亦可狎人生有意氣勿  
爲黃金使留待倉猝時去作報恩子

出都門車中感成

銓曹忝末秩入官增百憂淒涼出都門行止不自由古人希  
一命或爲家貧謀沿流鼓頽波非分遂有求假潤及奴僕舉  
債成山邱焜煌盛輿飾行道顧者羞脂膏給子母金帛紛牢  
搜初仕已不慎顛躓其孰尤首夏涉長道空囊行客愁布衾  
幸周體麥飯堪充喉敝車走閒關永日容夷猶平生齋粥奉  
過受皆爲賅所期寡物累庶免叢身譬寸心保終始勿作斯  
民蠹

揚州過竹素師綵衣街舊宅

門外蒼苔沅履綦路人怪我淚雙垂山邱華屋怱怱改只有  
春風似舊時

蝨

於世原無補飛飛也自忙出真嗤小草用亦展微光星月分  
輝遠關山照夢涼西風期戢影莫待警清霜

車覆積潦中

覆舟之下無伯夷債車之上無仲尼人生取舍在自信禍福  
安得窺端倪出門跬步凜傾躓保身日慎千金齋飛騰意氣  
入暮景垂堂之戒甯遽迷揭來捧檄走秦塞百里一舍遑暫  
稽駑馬馘鯨怯昏黑飢腸望櫪時悲嘶車前沮洳杳重險側  
足下懾千仞谿僕夫鹵莽試一擲如杵投白非人擠一覆不  
戒防再誤進退將等羸角羝入坎出坎偶然耳敢望神力陰  
提攜須與驚定還自笑蓮性肯受污池泥卻思江北魚大上  
男號女哭驚魂淒片帆所指失南北但有波浪無吟哇民居  
十戶九流徙况乃歲歲遭顛隤一身區區何足道哀哉滿目

溝中黎

徐州懷古

面面峯巒勢鬱若  
霸圖舊迹未全銷  
上游風雨襟三楚  
半壁河山限六朝  
大澤有靈龍氣匿  
荒臺無恙馬蹏驕  
惟憐汴泗交流地  
夜夜鼃鼃瞰麗譙

碭山懷古

漢高起徒步內助  
惟呂后陰謀出帷薄  
史冊十諱九苾碭  
五色雲真龍事當  
有自非望氣士安  
能識誰某篝火及  
斬蛇疑似孰爲剖  
將毋計素定權宜  
一時口夸辭激初  
氣神道亦有取糟  
糠決大策詎曰非  
佳耦後來鍾室謀  
厥意實潛受夢夢  
九原魂哀哉彼功  
狗

安邊城

斜日忽無色飛雪紛有聲龍沙朔風起蕭梢捲前旌重城沸  
笳吹言入安邊營安邊夙雄鎮列壁如羅星馬蹏踏黃沙殘  
骸相支撐搗來二百年中外通夷庚當時征戰地雞犬今不  
驚豈徒大一統懷遠惟德馨定邊指南北永夕仍孤征攝符  
豈虛畀所用蘇我氓去去敢告勞王事有期程

邊城春望

無分城南載酒遊寒煙二月古邊州花門山色臙脂冷榆塞  
春聲鬢築愁但覺驚沙迷雉堞苦嫌急雪灑貂裘男兒五十  
封侯晚獨倚東風感白頭

春郊勸耕

煙暖平沙潤不昏居民翻雪事雲屯  
天家雨露眞無限一路桑麻接塞門

風颭紅旗指遠峯野田佳處偶從容村人底事勞迎拜我亦  
南方識字農

蝗盡後示邑紳士用東坡次韻章傳道喜雨詩韻

農夫望晴兼望雨惟有蒼天識民苦南山自古不見蝗曲赦  
彈丸矜瘠土今年怪事詫耆老眾首仰空舌爭吐曉聞風雨  
響騷颯忽見連天交翅羽徘徊南北擇地下倉猝官民合心  
禦驅除田祖畀炎火捕撲佃丁排比戶宰官獨行難遍歷任  
賢者逸語徵古舊時成法在變化當機一誤後難補齋素壇  
場總具文惻惻寸心慙眾母微誠敢謂足感格拙政未能深  
恤撫豈知三日沛醲甘頓使萬家喧鼓舞除奸駢首不須刃  
保赤充腸與之乳神鴉飛啄萬鳥逐張口啞啞若相語紛紜  
醜類資掃蕩稽首神靈實爲主卻愁遺蟹伏山穴仍望豐收



還畎畝一盂蝻子易百錢  
鋤鍤鍤庶幾勤卓午山鄉  
礪礪嘆艱食絕少餘三計  
倉庾當年振借廬

至尊終歲周防煩  
大府諸賢勞苦肩未息  
思患休誇賀聲普  
令也不職當自劾  
會看衣冠挂神武

歸舟感興十六韻

百里歸程緩滄江湖急流推  
蓬成遠矚隱几足深愁  
岸落前宵漲渠衝舊日洲  
高沙全擁石古樹半當樓  
漁舍通朝市樵涇起夕謳  
經時但寥落何地得優游  
風定初回燕煙霏忽點鷗  
浮沈魚自樂來往鳥如求  
不定陰晴態無窮稼穡憂  
洪波艱厲揭瘠土費耕耰  
屋破茅虛補坡荒麥失收  
已難儲一宿誰復計三秋  
世路橫蛟蜃民生寄鵲鳩  
殷懷希竭慮豫事待勤  
諏日慘監明繪心勞曲突  
謀長吟聊獨寫涕淚滿扁舟

去任紫陽士民涕泣餞送夾道不絕眷眷之意何日可  
忘欲口占留別終不能成句至安康後始寄兩詩以  
誌別悃首章寄書院生童後章以寄吾民

燈火緣深肯暫忘春風玉樹記分行豈能寡過終知改亦有  
多疑喜善商白屋三閒佳士座青氈一領長官裝神峯回首  
寒雲黯好在東山舊講堂

語語官民豁肺腸五年真喜俗淳良政期息訟惟清靜刑悔  
從嚴爲保障未必生能比棠舍只應死尙戀桐鄉依然疴瘵  
相關處百里江流夢與長

忽有

忽有天南耗訛言或未真崑岡慘玉石碧海沸沙塵誰遣藩  
籬撤空嗟井邑淪汪徐前轍在咄咄彼何人

謂汪直  
徐梅

感事五首

華夷玉帛萬方遙沐浴

仁恩已

六朝島上游魂容乞命波中織鬣敢稱驕由來獾狃思周策  
漫說苗民格舜韶爲問登壇諸將相祇今誰是霍嫫姚  
供億倉皇物力窮羽書徵調正恩恩將多客氣防中餽士有  
囂心恐內訌下國星辰籌杼袖連營風雨臥刀弓

帝心尙念征夫瘁文綺金錢出

紫宮

安危一體誓山河闔外師千乘玉戈少府縉泉朝轉餉平江  
花月夜徵歌空傳握節何無忌未見銘勳馬伏波可待元戎  
親督戰腰閒長劍日摩挲

壞雲壓陣鬼聲酸  
列閭遙遙壁上觀  
聞敵兵逃先棄將守城  
民盡獨留官通侯  
闕闕全身易下土  
詩書報國難誓化冤魂  
作精衛填平碧海淚方乾

東南民氣固金湯  
敵愾居然大義彰  
弱餌有心搜海蜃  
威弧無意射天狼  
春田牛盡耕犁失  
秋澤鳧空水草荒  
休笑罪言狂杜牧  
幾人深計復河滄

題明妃出塞圖

漢京方有道敵愾豈無臣  
玉帛驕奴隸朝廷用婦人  
空聞傳怨曲幾見靖邊塵  
誤國成遺恨千秋說奉春

夜半

遠柝三聲轉殘燈獨影敲  
細繙初讞牘閒續未完詩  
夜色疎螢逗秋心早蟀知  
匏瓜繫天末無計問磷緇

秦嶺題韓文公廟壁

公文闢佛佛不靈佛力殺公公自生殺之不得公其神佛乃  
成公千載名當年遷謫緣宮市此日潮陽更萬里瘴海之行  
豈人力草昧乾坤待公啟公生公死命在天帝王與佛皆無  
權神仙狡獪頗解事乞公詩可希公憐雲橫雪擁偶然耳什  
襲已勒嫫媿編只今運會幾遷改突兀公祠徧寰海一表高  
懸日月光佛骨淒涼竟安在嗚呼安得攜來筆五色擘窠徑  
尺摩崖刻峩峩南山此文是南山不平公不死

患目聞五堰鋪被水力疾詣勘舟中書問

銀海蒸霞內水乾途人怪我淚沈瀾關心百宅通疴癢蒿日  
扁舟賸苦酸多恐蒼黎成膜視敢將飢溺付旁觀靜中大有  
光明界照向窮簷仔細看

胡太驟鏡破孰重圓業已成孤注何勞計萬全如勞人事幻  
不轉我心堅願守三從義惟諧再世緣尊章欣健在侍奉代  
周旋執贄青廬下承歡白髮前姑恩堪紀曲女史待成編潔  
膳思仁粟傾籠汲孝泉食貧艱措手荷重賴承肩可奈高堂  
寂空教宿淚漣翦金身欲奮銜石痛難填風勁摧貞木星孤  
隱女嬀湘東宜載筆隴右待題汗古調遺黃鵠深林泣杜鵑

將軍能紀事

浙標王參戎徵詩

嘉德廣流傳

董長庚

字鑑西永康人嘉慶癸酉舉人官海甯學正

朱藤歌和錢警石韻

東裝到海昌屈指經三載未知誰客誰主人亦如燕去雁來  
各相代亭邊古藤倚牆隅老逢老伴真吾徒花開屋上未曾  
見但見根節交盤紆彭城廣文喜相語羣賢鳩工日卓午縛

南齊書卷之三十一  
枝設架傍庭戶觀者顏開笑且舞春來和煦天氣晴滿架纍  
纍花結成賓朋咸集並酬和佳客名花二美并吁嗟乎白髮  
青衫天布置十居八九難如意今朝詩屋共盤桓賞心樂事  
誠堪記從師天福山訪友蘭陰寺不獨君思我亦思追懷前  
日猶兒戲世事浮雲任有無莫因老大悲童稚來年春日紫  
藤開更與諸公同一醉

海昌學廡義井歌

夫許澄婦胡氏相傳七十二娘子迄今埋骨不埋名數百餘  
年猶未死許君奉佛良有以曰驚山妻力開此我爲學中客  
時飲井中水竭來三四秋未識何代始義泉大字誌其旁頗  
與君謨筆相似又刻八行四十有七字剡苔剔蘚彷彿猶堪  
指同人歌詠紀其事我初欲和仍中止自嗟好古生已遲莫

辨魯魚窮亥豕今年幾效耿恭拜舊歲曾作安仁誅提甕憐  
無婦少君拓文幸有僧齊己水可涸井勿圯人已往泉猶是  
一人開之眾人飲功德無涯千百祀或元或明不妨等諸郭  
公夏五之闕文惟願世閒夫夫婦婦聞者皆興起

余

鈞

字衡平遂安人嘉慶癸酉舉人官長興訓導

梅峯書院蜀葵盛開忽一株爲風所折詩以惜之

絕代容華彈指空難將恨事問天公垣遮不斷連旬雨旛護  
偏招五夜風如此摧殘思昨日爲伊惆悵到衰翁黃昏不再  
憑闌立怕見香魂泣月中

陳敬祉

字蕤繁海鹽人嘉慶癸酉順天舉人著雪溪山樓集

縣志敬祉幼穎悟工詩古文詞尤究心經史之學凡歷朝地輿沿革官制異同均能歷歷言之瞭如指掌

吳山夜話時客有吹簫者



城郭參差海氣橫樓臺湖上碧雲生洞簫吹澈天如水閒坐

青峰話月明

陳含輝

號瑤峰山陰人嘉慶癸酉舉人官孝豐教諭著石巢詩藁

山公潭

空潭開勝境遺蹟說山公自有澄清志終殊放達風十居盟

白水啟事見丹衷所慨明祠廢臨流感不窮

昭明讀書臺

指點高臺處蕭梁霸業餘君王終佞佛皇子自劬書選體干

秋在前星五夜虛雨花休閒訊空復想端居

韓勝良

原名之錦字二橋蕭山人嘉慶癸酉順天舉人官太常寺丞著文起堂詩集十五卷

王曼壽序略先生篤於行以太翁年逾八旬告歸侍養

如陶俊如李清空如白而於大蘇尤為具體而微

潘曾瑩曰二橋爲先君子視學浙東所取士得官後以親老乞養開十餘年二老繼歿二橋亦垂老矣遂肆志林泉自題其室曰瓶花詩舫感懷遺興一寓之詩思致高曠越中稱詩者宗焉

### 爐火

爐火無緣話嬾殘  
梅將西笑向長安  
滿城木落風聲壯  
大漠雲陰日色寒  
作客十年裘已敝  
養親五斗米猶難  
江湖歸計何由決  
散髮扁舟弄釣竿

### 昇平歌

閒愁掃復來  
階苔日日生  
秋心遣不去  
草蟲夜夜鳴  
人生此方寸  
萬感何能并  
造物有定數  
人事焉敢爭  
山水無俗狀  
富貴無遠情  
結交藉聲氣  
未若鷗鷺盟  
儻得十畝地  
茅屋開南榮  
插槿華爲垣  
種松涼上棚  
游鱗養干尾  
搖動芙蓉莖  
話雨春翦韭  
搓香秋摘橙  
雞犬足閒意  
往來趁孩嬰  
卉木卽綺羅

風泉能簫笙東臯聚臺笠布穀先催耕鄰翁識天時荷杖占  
陰晴鎌耒日以響倉庾日以盈盎然熟春酒奉我堂上觥兒  
孫解羅拜蘭玉森崢嶸讀書可明理非以邀勳名但知道義  
重稍覺軒冕輕何苦墮塵網反爲仕宦攫祇此手中杯坐花  
聽流鶯旣醉旋復醒午飯炊香秔請嘗花豬肉已調玉糝羹  
飲食鼓我腹浩歌答昇平

許承露

字雲表號南園錢塘人嘗南園詩鈔

寄心齋詩話近鄉情更怯不敢問來人可謂肺腑中語  
近杭州許南園詩云鄉語乍聽翻覺異里門久別轉疑  
生非久客還家不能知此

登慈濟寺樓和壁閒韻

更上高樓望杳冥家山何處十分青三更海氣渾殘月萬竈  
秋燈亂夜星野圃又看叢菊冷此身還共暮雲停鷺鷗眠宿

如人意穩占煙波杜若汀

金陵懷古

有山如郭勢崢嶸鞏固天然斧削成  
霸業已隨流水去女牆猶向夕陽明  
羣峯環抱空江暝傑閣崔嵬古木平  
一自樓船燒鐵鎖至今寒夜打潮聲

石頭城

鳳皇已去獨留臺千古登臨步石苔  
攜屐適當新雨霽題詩曾記謫仙來  
大江浴日孤光動萬嶂撐天積翠開  
梧竹含青如有待紛紛凡鳥莫相猜

鳳皇臺

白門楊柳正依依花落亭空草自肥  
愁裏不妨連日醉春來又送幾人歸  
登臨莫辨天涯路風雨還侵客子衣  
短笛忽驚千里外離情脈脈倚斜暉

勞勞亭

暑風亭畔倚闌干落日疏鐘聽未殘  
夾道泉飛晴亦雨滿山

松古畫猶寒詩成僧愛閒中和花好人從靜裏看此是清涼

真妙境鑪煙一縷識旃檀清涼寺

錢廷煊

字小謝枚子仁和諸生官江蘇

杭郡詩三輯小謝上承門蔭文采風流傾動京國嘗與

孫觀察淵如吳庶子山尊陳學士荔峯張檢討船山楊

農部容裳陳大令雲伯誦酒徵歌極一時之盛以膳錄

甄敘得官歷金壇吳江丞簿擢幸吳江崑山抗塵走俗

非其志也歸出後與堂弟秋峴

董濬西湖一時水利賴以興修

緝雅堂詩話小謝詩如千里相思曾入夢十年漂泊自

填詞中年入世猶招忌作客逢秋亦大難愁能領略便

成趣境到蕭疏每耐看可憐懷抱非前日如此江山半

夕陽風前短枕頻聽雁雪後橫江自打魚結調悽苦不

忍卒

紅毛刀歌為毛壽君孫賦

堂上颯沓生秋風三尺古光出匣中蕭然冷氣逼毛髮二十

八宿搖晴空滿堂動色歎不止剛可殺人柔繞指人言此刀

初鑄時其氣往往成蛟螭龍身幸不久塵土所恨零落無人  
知嗚呼方今  
廟堂歌雅頌兵革百年久不動普天率土安耨耨甯使此刀  
藏不用

友人寄書詢近狀詩以答之

擊筑悲歌易水寒三年慙愧住長安書猶能讀其如懶人到  
無聊始作官詞筆尙雄和淚寫家聲欲墮爲心酸江雲江樹  
遙相隔此日相逢一笑難

短簿祠

流水寺門前荒祠落照邊春風王令宅芳草永和年屋小依  
山翠人歸泛渚煙卽看遊屐少虛爲黑頭憐

以詩代柬寄邵可亭昆季

當時西笑望長安誰道關山路渺漫舊雨飄零疑噩夢故鄉  
辜負有漁竿中年入世猶招忌作客逢秋亦大難羨煞諸君

好清福杯開新釀蟹登盤

高日濬 字犀泉 仁和人

楊振鎬曰君工篆刻陳雲伯大令論杭印傳者首推丁  
龍亂而黃小松奚鐵生陳秋堂曼生衍其派亦各有心  
得若犀泉與蔣山堂施石樵  
湯古巢汪靜淵皆稱名手

沈霍山 學寬 桂嶺觀親圖

思君幾瘦沈郎腰逆旅承歡暮又朝細語誦誦問親故燈花

挑盡篆香消

查奕善 字六其海甯人 箸吟香閣詩稟

吳衛照曰六其少客維揚中年後無所遇而歸里居授  
徒傲裘疏食雖極貧無戚戚容為人疏爽豪激所謂落  
拓之性出自門風矣

登紫薇山絕頂

絕頂危樓聳登臨亦快哉羣峯皆北拱一水自東來古佛多  
奇相真仙有舊臺山花渾不識隨意路傍開

題放農弟逸江湖載酒圖小照

一葉飄然出世塵煙波浩渺水逢春破愁無兩厥惟酒對影  
有三何用賓菩薩權為都散漢英雄竟作老閒民茫茫彼岸  
回頭是我亦當年爛醉人

岳鴻振字嘯凌號梭雲嘉興人  
著菊照山房稿五卷

周廷俊序略嘯凌賦性伉爽曾無矜畦學問已  
深遊覽日廣故發為歌詩絕去依傍不落凡響

淨土禪院喜晤虛巢大師

談元忘日暮相對坐移時松子落如雨梅花開滿枝地偏人  
過少樹密月來遲自解安心偈還酬支遁詞



夜過塘栖

打篷雨歇燭花低  
水驛迢迢路不迷  
夜半嘔啞柔艣發  
載將殘夢過塘栖

勞

鑠號半林石門諸生

耐冷譚半林秉性高介室如懸磬不作顏公乞米書也奉寡嫂極敬人尤重之

山居

境僻塵囂斷  
終朝逸興閒  
泉聲鳴曲澗  
鶴夢冷空山  
學佛心先定  
編詩手自刪  
絕無車馬至  
長日掩松關

陸樹蘭

字敏滌號西解平湖諸生箸抱月軒詩鈔

徐熊飛序略西解幼丁孤露讀書刻苦自勵聚生徒教授箬書不輟嘗與予寓西湖石佛寺夜深被酒縱論平生出處及所遭坎珂侷僚之境時鐘漏既息鳴蟲滿山庭木窸窣交下各相對沈瀾索歎不能自已

閒居

閒居抱病自長吟庭樹扶疏綠意深養病衣裝隨冷暖種花  
心事計晴陰詩書澤少言宜盪山水緣多夢亦尋萬籟不生  
惟靜妙無絃琴上覓知音

江北店

馬解鞍客洗塵野棠花簇山店春卸裝旁午僕云瘁邨酤欲  
酌還逡巡當壚少婦工笑嚙綽約儀容窈窕身尊前爲我歌  
一曲琵琶潑刺揚朱唇夜良苦短那辭醉門外已聞車鞦韆  
曉煙滿林月墮地黃沙大漠愁無垠樗材鹿鹿隨勞薪茹苦  
得甘情易親何況燕趙多佳人

秋夜

涼意生虛館書帷暗短檠露蛩和月語風葉上階行貧賤無  
良策艱危重老成曠懷齊得失何事不平鳴

俞思源

字原水號稻鄉平湖諸生著春水船詩鈔

朱子林傳略原水生而穎異甫學語能辨四聲五歲善屬對出就外傳勤于肄誦詩賦文詞落筆如有神助殆風慧云

彈琴

空江彈素琴恍惚夜猿吟一曲蒼梧怨愁余雲水心相思託明月聊以遺知音搔首暮天碧離情深復深

戰城南

戰城南城南城北遙相望天風蓬勃摧搏桑白日出海無晶光紅衣天半來瓦礫隨飛揚壯士洞腋死白骨堆秋霜狐狸夜號山鬼哭烏鳶羣飛啄人肉肝腸零落南山隈爾獨何辜使我哀

朱

雷

字雪筠平湖人著愈思廬詩鈔

于源曰雪筠爲草亭丈從子工寫花卉生香活色得顯  
香真趣詩有雋句如螢火云小院川明螢語亂破籬雨  
歇豆花肥夕陽云半响晴光牛背淡一鞭秋色馬蹏驕俱佳

詠史分題得介推母

文嬴歸辰嬴從齊姜不入晉侯宮魏犇傷顛頡黈介推不食  
晉侯祿微時故劍尙少恩何況羈紲從亾人此意母其知之  
矣沁源山中隱而死晉君無臣母有子當時但爲縣上田後  
人紛紛空禁煙

題吳聽濤先生詩卷

廣陵調絕復誰彈白雪詞高屬和難一片古琴樓外月年年  
清影照闌干

胡世異

字以權號歐庵烏程  
諸生著歐庵詩鈔

吳興詩話歐庵能詩與丁溶  
陳文煜揚知新友善多唱和

入春二月農事方新課讀之餘流覽郊野偶懷古田舍  
之作成詩四篇

仲春和氣至陽景滿郊原春風入我屋春草長我園田父閒  
過我相招隔短垣開門時共眺坐聽鳥雀喧耒耜今已具耕  
作應日錄

臨溪一做廬蓬蒿塞戶牖今春稍葺理將謀安八口門前桑  
榆蔭隙地不盈畝吾廬幸獲安敢復惜身手呼兒朝飯犢起  
約躬耕耦

良苗列阡陌苗盛惡草稀芸鉏銷永日日莫還來歸荷篠趨  
東原遙見炊煙微到舍間稚子曾無客款扉

眾懷貪得情遂失閒居樂我心方浩然不復念窮約覩茲禾  
黍熟終歲欣有託烹羔聊自慰風味亦不惡獨攜濁酒杯相

對成斟酌

懷潘勵齋

好友五湖住扁舟未到門西風吹別夢昨夜過前邨我意煙  
波渺君家松菊存秋餘擬乘興放棹約開樽

朱廉治

號青父歸安諸生  
著黃雪齋詩存

遣興五首依少陵韻

錄四

良時不易邁勞人多苦心今已不如昔況復後視今平生嚴  
取與舉俗疇知音是以言利者直尺而枉尋我將脫塵網匿  
迹巖下林

兩弟歸幽壤長子竄遠方耳聾齒漸落來短去日長秋風破  
茅屋倚門復奚望前山盛荆棘後山多豺狼仰天一長歎涕  
下不成行

凜冽歲已暮郊原多悲風庭松冒微雪園菊披荒叢暮雀聲  
啾啾所悲舊巢空新巢固難得遑問西與東安得隨鴻鵠矯  
翼青雲中

我歌紫芝曲渺焉難追攀我誦陶公詩恍如對南山顯默固  
有時用舍在其閒遐哉荷篠翁日入負耒還兀然傾一壺常  
有好容顏

五君詠

慎朝正

字端揆號南村有  
研露齋詩五卷

慎老居南村獨抱固窮節無心學陶詩時闢柴桑室著書茅  
檐下卓論人罕識務在正名義豈敢任纂述書成獻杭公世  
棄置良可惜沒世竟無稱明經復何益

姜宸熙

字檢芝號笠堂有陵  
陽山人詩鈔八卷

檢芝讀書處滿屋生蒿蓬不愁家屢貧但憂詩不工辭家嶺

嶠游雲海盪其胸朗吟寶劍篇和者徧禹東惜不逢陳梁嶺南

詩家有陳元孝浩然寫孤蹤衡門足偃息歸老陵陽峯

葉詩字正始一字持伯有玉澗吟稿弗措齋詩

我誦玉澗詩如循玉澗行淺深隨所至一一皆澄泓清風松下  
來妙悟如有神況是左丞後淵源豈不真草廬居窮巷簞  
瓢終其身至今風雅林僉曰葉山人

王涓字懷初號東廬山人有橋東草堂詩稿

王涓事遠游結交徧吳楚費盡懸河口中情了何取有時歸  
敝廬典衣換清醕獨酌高槐陰終日無一語詩人命固窮遷  
客氣屢沮金盡運亦盡傷哉淚如雨

高文照字東井有七峯草堂詩



高生青雲器弱冠成貢士權門多噂噤勿效貢公喜三十登賢書詩名達

帝里何天不降康喪妻兼喪子更不假之年見運竟在己名成身不成身沒名不死

田園卽事次葉詩韻

貧居思太古所樂在田園獨樹溪邊路斷橋煙外村有時橫釣艇連日閉蓬門偶值雞豚社心期正可論

虞廷宣

字漁華慈谿諸生著緘石齋詩存四卷

曉過兗州

侵曉趨東魯夜氣接洪濛初陽忽晃漾天際生微紅須臾升朝霞皎若凌太空曦光散平野宿麥披和風露柳溼未乾山翠曳融融遙瞻泰岱峯日觀飛高穹何日躡層峻極目東海

東

邳州道中作

天光幕四野灝氣彌空隙樹杪閣夕陽界畫出遙白遠疑春  
水明近復煙蕪接驅車沿大堤潑眼湖光溢隔岸微山青明  
媚舒笑靨風帆盪輕舟勞此塵中轍乃悟真實境迴殊幻象  
滅緬懷赤松子可望不可卽

重過洪氏園有感

名園花事屢招尋惆悵春光日又沈爲問巖前幾株樹種時  
誰抱十年心

潘希淦

字懷香會稽諸生

湖陵官舍除夕

依然臘盡紀星迴喜飲團欒度歲杯塵事漫牽新傀儡鄉心

還寄小蓬萊從今不託沿門鉢憶昨猶尋避債臺若問年來如願否六花飛向鬢邊催

牟景皋

字廣颺黃巖諸生著廣颺集

磨崖中興碑歌

漫郎老居涪水湄磨崖曾勒中興碑高文大字尙可讀披苔拂蘚餘深思天寶往事那可問楊家姊妹同龍祭羯兒竟爾踐御榻蜀道一去何當歸此時太子宜監國反旆而東乘其時靈武卽位繫眾望苟不帝制事孰爲羣才用命二京復遂令上皇還京師父堯子舜事兩得安居興廢無猜疑當時作頌表開闢二聖重歡甯寓規吁嗟乎唐家家法不善貽倏乃牽於婦寺私內嬖外寵其相結淒涼南內同囚羈前後功罪各參半定論自有青史垂舊臣卽事歸君善豈有揚頌存微

詞老於文學雅自負欲賡清廟明堂詩平原賢守感忠義縱  
橫大筆何淋漓涪翁何爲深痛惜摭取舊惡翻刺譏高崖屹  
立垂久遠對此不覺長歎咨知人論世誠難爾溪流汨汨如  
傷悲

陳培元

字春堂平陽諸生  
著聽松軒詩鈔

鮑臺序略春堂詩詞不多作知之者鮮獨瀛湖芭齋吳  
公奇之使嗣君從游故談而明經華夫學博肯工於詩

春日遣興

春風從何來吹我庭樹枝忽聞好鳥鳴交交欣得時林花昨  
夜開嬌姍何多姿萬物各有得予亦領其私偶從池上酌春  
波漾漣漪佳景徧眼前可以吟新詩不見素心人悠然結遐  
思

山行

秋意淡將夕故山殊可過薄雲成雨少黃葉受風多寥落方  
如此蹉跎不奈何惟應耽逸興聊以寄行歌

讀謝茂秦集

短褐飄然意氣橫朱絃疏越有清聲一時風格追唐代千里  
詩名出帝京尙憶諸藩能下士可憐七子竟寒盟文人自古  
相輕甚手把遺編重愴情

夜來香

回闌曲曲影紛紛掩映偏宜靜夜分非雨非雲香滿路前身  
可是辭靈芸

張

璜

字元圃嘉善人嘉慶癸酉副貢著止虛室詩鈔

納涼絕句

種竹栽花一徑開綠陰如幄覆蒼苔就中便作羲皇想未許

徐陵帶熱來

夕陽流水板橋西  
野草閒花占滿溪  
自喜愛涼心計早  
豆棚

小架不嫌低

周中孚

字信之號鄭堂烏程人嘉慶癸酉副貢著山茨詩錄

縣志中孚與弟聯奎同肄業計經精舍編纂經籍  
囊訪著述甚多身後皆佚王昶湖海詩傳錄其詩  
輯雅堂詩話鄭堂有亭林年譜未刻不審  
較張本詳略如何此書無傳甚可惜也

遊萬魁塔院

古刹傍危巒  
凌虛足壯觀  
諸峯浮翠黛  
一水漾清瀾  
梵響法  
雲裏猿聲幽  
樹端殷勤尋  
勝迹不覺夕  
陽殘

月夜泛舟

良宵如此月  
載酒木蘭橈  
漁火依遙渚  
星光落晚潮  
半帆清  
影碎一帶宿  
煙消經過蒲  
塘路良朋抗  
手招

過費宏韜齋

小圃經年築蓬門，鎮日關栽花疑入畫。疊石宛成山，竹外茶煙靜。籬閒鳥語閒，結鄰曾有願。勝景許同攀。

贈潘二崑

白蘋洲畔綠楊陰，靜掩衡門歲月深。高士書還藏萬卷，真人方自擅千金。客來嶠外頻談劍，鳥語窗前獨撫琴。安樂窩中幽趣在，隱居何必定山林。

秋夜書感

蕭齋秋雨後，寂寞一燈懸。短笛飄殘夜，疎砧擣暮天。自憐吟積瘦，深惜酒成顛。怪底西窗月，偏來照獨眠。

東劉大海甯

劉子杼山隱，飄然鸞鳳儔。閉關惟頌酒，乘月獨登樓。忽憶隔

園好駕言滄海游何時將一笠鼓棹白蘋洲

周澍 字旬占號雨亭天度孫錢塘人嘉慶癸酉拔貢官雲南迤西道

杭郡詩三輯雨亭初令江右決獄如神有周青天之日晚年歸里居橫河橋北咸豐甲寅重游泮水

題斷指圖為魏貞女作

城上秋高急暮砧嘯猿哀雁愴宵深粉書灑盡和衣淚曇偈空餘繡佛心古井無波沈逝水女貞有木哭焚琴髮髡臂斷

猶前志留得芳名耀古今

高應元 字辛才富陽人嘉慶癸酉拔貢官四川永甯道

許淮祥曰吾師辛才先生學問淵雅弱冠登拔萃科作令畿輔游守中州多惠政均以廉幹稱年七十罷永甯觀察使以蜀道難乞病歸宦藜蕭然當事者聘主東城講席數載教士有方多所成就家無寸椽養痾詰經精舍卒年八十有三詩稿散佚謹錄述懷詩兩首以存梗概

八十述懷八首 錄二



頻年師訓捧心頭七字箴言贈別留錢塘趙省谷先生自幼

聯贈別云宦海波濤牢把舵心田禾稼莫傷根服官五十無

欲更防剛自用有才莫向刻中求一句訟案無留牘任牧令

詞訟一句審結從無卅載刑官未決囚盜均未遇情實之案

或亦哀矜一枕夢安閒聊自遣清風函袖月當樓

念所感召耳立馬軍前草檄曾從征河朔

湛恩承授潯州府命赴河南軍營差遣聯莊弊政騰民怨散脅

明言服眾膺結連三郡同時告變奉檄守懷慶合各鎮兵剿

捕設法解散職除首逆三人合郡百姓提戈驅伏莽入郊荷

晏然就獲王戌衛輝連莊餘匪李占標等復起滋城高百雉

工千腋何日聲聞最上層懷慶城工自三年被圍後類壞已

固丁卯西捻犯豫復圍懷慶不得入厥功甚鉅以未

經報部在先不業人奏捐向隅服官之一憾事

張金照

字澗壺又號川波平湖人嘉慶癸酉拔貢著三影書屋彙

家傳略澗壺詩風骨高鸞筆情雋爽在都中時京洛諸名宿相與角逐咸推為詞壇健將

短歌

美酒難澆胷中愁寶刀難斷江中流春風一夜破芳萼昨日  
花開今日落落花到地為塵埃流水東去不復來酒酣醉拍  
銅斗歌古人不作傷如何

楊炳堃

字蕉雨知新子歸安人嘉慶癸酉拔貢官湖南鹽法道著吹蘆小草

謁伏波祠

靈旗颯颯颭西風入廟虔瞻矍鑠翁  
峒婦入蠻秋草外灘橫  
三鳳落霞中勳高銅柱名常在  
謗啟明珠恨未終  
此日承平清晏久封侯何事立邊功

望天山作

好與天山結淨緣時時嵐翠落吟鞭上留太古難消雪長作  
人閒不涸泉首藉春深朝牧馬舊畚歲熟舊屯田邊疆生計

資滕六合建靈祠祀几筵視典有風雲雷雨而無雪神  
邊氓似應專祀以隆祈報

施錦心字組蘭號春蘿遇時于孝豐人嘉慶癸酉拔貢著  
萬松酬唱集北征少作西冷集蚊眉窩草客越吟

慈珠樓  
雜著

西圩譜錦心嘗從歸安王勿庵侍講游學武林癸秋拔  
萃松陽文學孟小嶧高士復與之締交甲戌春將有都  
門之行小嶧遠來過訪居浹旬為繪村居十景圖先素  
詩小嶧少工吟哦尤善綴染錦心以模山範水之思供  
殺粉施朱之用分  
題部署藝林稱之

以拙著繹史錄并數米庖言未刻彙寄呈侍郎王勿庵

師江甯學署兼示錢竹孫同年師康姚風裳公子培

廣

索莫慚家食文章失故吾題橋誰意氣仰屋此頭顱秋士劍

三尺冬心衣五銖狸毛自憐惜路鬼尙挪揄

竹孫富家學

錢君為竹汀宮詹孫

姚子自超羣抱膝對千卷中心懸二

君踏槐殊草草落葉已紛紛有約公超市偏師張一軍

簇蠶詞與伯子同作

兒家今歲繚嬾速小院悵悵禽語熟輕暖輕寒養麥天但祈  
三日宜温煥簾櫳無那舊蝸廬成行愁密草愁疎年來一度  
新榆火風教蠶桑籌瑣瑣絲頭劇似阿儂心任擲然梭熨貼  
妥君不見雲錦宮花繡襦襜仙姑歲祀馬鳴王西鄰有女猶  
耽嫁陌上花開又采柘

王德沛

字市水郵人嘉慶癸酉拔貢官翰林院特詔

待雪

飢鷹集木杪凍雀窺簷牙日光淡以薄巷靜人不譁庭前有

梅樹老幹撐槎枒呼梅與之語明朝應著花

沈

厚

字心田會稽人宛平籍嘉慶癸酉拔貢改歸本籍官松陽教諭

馬永高曰先生文名甚重如全小汀侍郎金穀生觀察皆高足也工書詩文多不留稿歿之夕其家夢有老僧來迎異香滿室殆有夙蒞者著學宮典禮備考

題杏舟山水畫冊

江頭漁翁結茅廬青山當門畫不如江煙澹澹雨疏疏老翁

破浪行捕魚恨渠生來不讀書江山如此一句無放翁我亦

衰遲慙筆力坐對此圖三嘆息

洪震焯

字百里號樹堂臨海人嘉慶癸酉拔貢著樹堂詩鈔

縣志阮元嘗纂十三經校勘記震焯任小戴禮修纂經籍義詰震焯任方言所刊書籍多經校讐著有夏小正疏義五卷樹堂詩鈔石鼓文考異各一卷

登六和塔

七級鎮江干凌空一倚闌月垂滄海闊想結暮雲寒古越憑  
遙指秋潮入壯觀客星高可接將去問嚴灘

七里瀧

碧流淼淼漾晴沙兩岸青山夾去槎仙境不知誰領略炊煙  
白處有人家

一枕清風過睦州釣臺高處緬羊裘盡羅山色歸臺下天子  
先生作臥遊

山樓望雨

銅鑪潤凝香曉色遲虛幌春山不可卽宿雨滴深響遠樹何  
濛濛一氣清漭漭依稀雲樹閒輕帆落漁槳春江闊如許桃  
浪日漸長習習白蘋風時其波濤上迴看雙危峰嵐光相摩  
盪滿樓涼氣多便作蓬瀛想徙倚思徘徊憑軒豁清爽

擬古

異材固難得蓄寶誰知音蔡生去千載悠悠焦尾琴丹葩敷  
宿莽紫靄橫暮岑終朝資相對幽懷付長吟

李

誠字師林號靜軒黃巖人嘉慶  
癸酉拔貢官美南順甯知縣

縣志誠研究經學貫串該洽解組後總督阮元委修雲  
南通志著有十三經集解二百六十卷微言管窺三十  
六卷萬山綱目六十卷水  
道提綱補訂二十八卷

擬古詩

明月皎如晝清風吹我衣遊子久行役節改音猶希地冷霜  
常白衣單寒倍威一面得如願具悉腰瘦肥努力事長征單  
于騎未歸揮戈春日逐仗劍寧曾旂立功玉關外長嘯步紫  
薇刀環遠相盼遙夢縈金微

王夢庚

字槐庭號西隱金華人嘉慶癸酉拔  
貢官四川川北道箸冰壺山館詩鈔

李宗傳曰西躡詩本溫柔敦厚之旨發爲中正和平之音如三十六洞天之幽深邃遠

絳州曉發

長安路遠望層霄雲棧行程課隔宵月落絳江星影大風高  
錦里雁聲遙五更春倦人難醒三月寒輕雪易消最是鶯花  
能媚客曉煙吹徧綠楊條

擬古九首

錄三

人事有代謝心迹無初終念我色憔悴狐裘歎蒙戎縱有三  
尺劍不敢誇英雄持此冰雪心凜凜懷清風

巨魚縱大壑快意隘九州跋扈投涸轍斗水難可謀所以古  
達士不營非分求豈不具偉抱智慮恆獨周

商山在人閒紫芝亦可采行雲暮歸山羣流終入海但愁迷  
陽多猿鶴空久待能不櫻垢氛庶以免尤悔



雜詩

泰山高萬仞初不辭微塵人生天地閒藐然存此身苟不自  
淬勵日與塵垢親論交貴求友所處必擇鄰砥行日孳孳罔  
閒昏與晨庶幾策頑鈍抗心希古人

日月如跳丸朝夕催人老轉瞬成衰翁春華難獨保機實自  
召之水溼火就燥既往思補苴提撕何不早服食求神仙徒  
自傷懷抱金石適戕生引年忘大道

夜長示諸孫

晝短知夜長晨光亦未晞靜言思補過忽悟昨者非輾轉不  
成寐欲起難奮飛少壯失東隅空戀桑榆暉炳燭縱有光已  
蹈玩惕譏願言二三子惜此杪忽機努力愛三餘困學或庶  
幾

鄭桂金

字月波號秋浦西安人嘉慶癸酉拔貢著七松閣遺稿

西安懷舊錄伯祖月波公拔貢考用知縣辭不受歸里著書稟本甚縷

白雲庵讀趙清獻詩卽次原韻

琴鶴高風有幾家山庵遺句劇堪誇亭邊細草初眠鹿竹外

新泉自灌花閱世漸驚人老大書牆不覺字敲斜飛仙綠髮

何曾見一角浮雲月影遮

余

鏗字鯨文龍游人嘉慶癸酉拔貢官金華教授

緝雅堂詩話鯨文才筆高特五言古詩殊得魏晉人神旨所著有白華樓詩稿二十卷花深吹笛詞八卷經亂

散佚存者僅什一耳

雜詩

孟夏陽氣盛陰霖一何繁商羊舞未已黑蜩方騰淵明燈搖

虛幌宵漏沈不咽襄帷失清曙飯甕聲潺湲潢潦積階除猶

聞嘯鳩喧靈翳忽及旬罕見曦景妍遙念高原上宿麥黃翻  
翩腰鎌刈方半餘穎逝將捐前年雲漢憂灼龜坼芳田雖有  
升斗獲依然哭窮檐唯望膏澤洽新畝兆豐年延頸瞻麗旭  
誰能顙穹天

獨坐觀羣書灼灼炎燈明耽讀夜未半蕭條四壁清我本懶  
悵人觸緒感易縈不覺百端集往事交縱橫衷懷時耿耿匣  
劍鎗然鳴悲來遂廢卷攬帶還獨行微陰漏片月疏星照前  
榮蓼蟲棲莖葉傷禽遺哀聲微物猶足感增我慷慨情還癡  
不成寐荒雞續殘更

鷓鴣催芳春春芳俄復謝開謝彼豈知總自安元化欲更裁  
眾蘗新畦治方罷將使流金日散髮消炎夏雨中草怒生非  
非沿石罅蒼碧復堪賞徙倚時多暇天機任自然無人鳥雀

下

仰首思萬古忽然悲我身文章若性情澆漓日失真咸洛氣  
澤沃投膠大江津歷歷建康代乳泉蓄齋淪昌黎乃別出繼  
起徒因循如彼決隄水尾閘孰爲振洪鈞埴萬物此意良不  
仁元精或已竭文彩勿驚春何爲今作者迢迢隔先民魯酒  
輕千樽醉心思飲醇寂滅正始音遺簡徒有神所以柴桑叟  
託志羲皇人

中廚具湯沐蠛蠹羣相弔新衣澣未久氣化相感召忌險甚  
處堂附熱同媚竈體中小天地此輩良不少處君肘腋閒膏  
血忞陵暴其名曰陰賊抵賊逞不肖去此附身患爽如疾初  
掃景略何偉哉風清坐長嘯

雜詠南方草木

并序

余

壑

三

覽嵇含草木狀記童時侍先君子宦遊嶺嶠蹤跡數  
 州光陰十載核所聞見殊有參差婆娑之桂四時發  
 花礫礪之榕子熟生螳陳編記載非無遺漏至若五  
 斂子之名羊桃乃是今昔之異甘藷汁之製糖冰僅  
 起天水之世雖前代未聞要可補嵇書之缺撮其崖  
 略綴以小詩義取圖讚方物之遺詞仿吳歌西曲之  
 體其昔所未覩及他州並產者悉略之焉

南風吹漸黃滿樹連房密雪中畫青青那得有花實

蕉子

花田無數芳貫串上釵梁夜來鴛枕畔不是鬢雲香

未利

名未殊榛栗託根山石高如何張博望只解種胡桃

石栗

觚棱分面面相隔不相見酸似妾心酸此味要懂戀

五稜子

仙人膚凝脂薄薄紅綃束誰作蔡君謨更詳海南錄

荔支

沃雪體玲瓏含風枝婀娜蕉衫坐樹陰日啖三百顆龍眼

未解文園渴已蹙雙眉尖欲知除澀味更下水晶鹽橄欖

聞道有佳客金盤持送郎莫言藤葉捲勝含雞舌香檳榔

試參金粟界氣香四時同何如靈隱寺只解落秋風桂

輪囷十畝陰不見陽烏度子落長虺虺蚺蚺還撼樹榕

剖此堅貞木含漿潤齒牙一飲醉如泥不用采椰花椰子唐殷堯

封寄嶺南張明府詩椰花可為酒誰拌醉如泥

林挺紫玉竿豈特蔗漿好幾日榨牀聲團冰何鬻鬻蔗

題明夏內史集弔存古完清

長山王氣一時新猶見殷頭各舉兵豈有洪波生帝纛竟從

孤島死田橫干戈滿地留完節猿鶴殘軍盡哭聲愁煞哀江

南一賦存古有大哀賦時人比之子山白頭不及庾蘭成

函胡短後執戈隨授命翻從弱冠時湯問眞成憂杞國楚些  
還許續湘纍叢殘賸有唳鵑血嗚咽都如采葛詞天與驚才  
兼亮節魂歸朱鳥未須悲

信安歸途

自笑謀生拙還爲世網牽陰連烏柏陌人穫葦薺田雁語聞  
煙際鴉歸在客先關心問節候幾日又華年  
荒荒殘臘景草草倦遊身耐冷江梅靜唳飢野雀頻遠山雲  
補樹空野草爲人薄暮雨還作中途倍苦辛

北固山寺題贈石雷上人

已公棲息處初地靜愔愔竹雨和清磬松風鳴夕琴江聲流  
客思山色悅禪心歸路不知晚衣裳雲氣深

朱

寓

字翼人號西巖浦江人嘉慶  
癸酉收貢箸眠綠山房詩鈔

鄭祖芳序略西巖詩極情寫物窮  
力追新細按之自有一種清氣

### 秋草

寸心不忘報春暉  
夢醒池塘候已非  
南浦久憐芳草歇  
東風曾見落花飛  
六朝裙屐人何在  
萬里關山馬正肥  
蕪盡田園歸未得  
青袍猶著舊時衣

說刀行

李藹堂作小印曰琴軒鼠璞長歌見謝有割雞焉用之戲說此答之

君不見曹丞相操才絕倫  
屈身曾作捉刀人  
又不見蕭相國何功  
蓋世出身乃是刀筆吏  
古來豪傑不離刀  
英風燿燿吹孟勞  
我當偃武刀不用及鋒  
且試雕蟲雕雕蟲本是壯夫恥  
刻楮三年腐言耳  
學書學劍兩無成  
學得屠龍殊末技  
邇來挾技遊琴軒  
主人投我石一拳  
石不能言忽人語  
願爲鼠璞刀應許  
操刀割石石點頭  
砉然解如庖丁牛  
星斗羅天土委



地頡籀夜哭斯冰愁躊躇四顧提刀立朵雲陡向刀頭擲似  
爲朱雲請上方博浪一椎飛霹靂吁嗟乎上方玉具高拄頤  
補履終讓三錢錐割雞斬馬貴適用金石刻劃刀能爲刀乎  
刀乎與爾說從今休懾萬人敵八面蛇矛攢刺來白戰吾將  
持寸鐵

黃崙山明府

崙

入祀七侯祠詩以紀事

典祀有濫廁史傳多諛辭眞實不假借惟有民間祠吾浦祠  
六侯政績臚口碑後有楊邢何前有須莊黎黃侯最後來六  
年其德滋好士如好色愛民如愛兒心勞政似拙下考書上  
司侯來山水喜侯去魚鳥思思侯莫報侯六侯而七之七世  
可觀德七卿同賦詩祠成侯勿讓公論非阿私

雜詩

食葉蠶吐絲所吐絲非葉釀蜜蜂采花所采花非蜜花葉自  
口入絲蜜自心出寄語讀書人莫謂書糟粕

有象獸而人于田爲舜耕有象人而獸掩井復焚廡舜爲天  
子矣耕象宜三公胡爲殺己象有鼻加崇封思舜封象地知  
舜封象意象用莫如鼻封此象可制象不得有爲義盡斯仁  
至此謂唯仁人愛物先親親

石馬頭看煙火歌

馬頭石上神敲火敲出煙花千萬朵石火居然作電光壓倒  
鼇山驚倒戟時兼有鼇山戲遠看竿柵高低懸近看繩索縱橫纏此  
閒閉置究何物火頭未起心先然火螢一點穿煙入火鴉萬  
翅衝煙出燿如窮后射九日慘似周郎燒赤壁咄嚙膈膊聲  
漸收畫屏開處搖龍舟葡萄擁乳蓮並頭鯉魚散子獅搏毬

忽然擁出浮圖來其高一丈大十圍六棱七級燈累累佛光  
四照揚明暉煙銷火滅各歸去秉燭夜遊存古意歸來擊石  
唱高歌猶帶馬頭煙火氣

水仙花

花有登仙者翩翩水一方肌膚若冰雪魂夢亦瀟湘淡極欲  
無色靜中時有香移情誰作操清影落琴牀

章

柱字巨卿分水人  
嘉慶癸酉拔貢

西泠

西泠吹雨晝冥冥深淺螺峯疊畫屏似替蘇孃作寒食小桃  
墳畔柳枝青

李士京

字仙苑樂清人  
嘉慶癸酉拔貢

朱壽保曰士京為  
名花十友之一

黃山雲海歌

奇峰削削插雲霄振衣直上心動搖陽崖陰壑疊獻媚白衣  
蒼狗坐相邀我來徧訪黃山勝丹宕石柱競高標朵朵削出  
金蓮瓣三十二峯更岩嶢如此奇觀已嘆絕荆關之筆不能  
描須臾油雲忽四起眼界展拓益迢迢時而蜿蜒如蛇伏時  
而擎攫如龍跳時而周圍如廣幕時而懸挂如冰綃離奇百  
怪不可狀天風猱雜勢益驕波譎雲詭平空起滉漾幻作廣  
陵潮俯闚微茫凌窮髮仰視突兀通碧寥彷彿如槎浮天漢  
空青一柱露山椒蓬萊瀛洲咫尺耳對此一洗人海囂揚塵  
曾傳王母語觀日不須素皇橋巍哉黃山齊泰岱我欲從之  
挾以超安得仙人容成子山頭大笑拍手招

訪菊

天末西風生夕陽淡無語想像籬落開冉冉黃花吐人世屏  
塵氛物外結佳侶緩曳七尺筇尋芳幾延佇初疑樊川莊又  
訝陶公圃主人但蒔花終日掩蓬戶不待入座來清芬吹縷  
縷緬彼古隱淪蕭然此環堵

王懋功

字熙績汝楫子雲和人嘉慶癸酉拔貢考取教習

白龍山

為訪龍山勝扶筇上翠微雲光連徑滿瀑氣隔林飛寺廢空  
留礎嵐霏欲溼衣登臨無限興歸路已斜暉

覺是亭四詠

炊煙一簇傍東城墟里猶傳舊宅名愛上賓陽樓上望雲山

無數獻新晴

梅里朝暾

古木陰森覆石梁夕陽時節試追涼怪他鴉背翻難定一點

餘暉樹杪黃

樟林落照

雲根橫互接沙汀鏡面盈盈淺水渟欲訪當年題柱客藤花

依舊護溪亭

石橋流水

亭亭塔影倚斜暉煙鎖禪關行迹稀幾杵鐘聲搖不定白沙

隄畔一僧歸

野寺晚鐘

歲暮感懷吳遠塵

用中

一劍延陵感故知平生然諾忍相欺夢中幻出相思路雪滿

空山酒不辭

姚光烈

原名珣字東石仁和人嘉慶癸酉優貢著竹香齋詩鈔

俞樾曰母舅東石通句股算法受知阮文達補博士弟子員文名與許文恪不相上下每試名次亦相等癸酉拔貢文恪猶云東石先生得優貢同治間樞在京師見許文恪文恪猶云東石先生得優貢同治間樞在京師見許文恪聘時羅德清王謨繼室陳氏未娶而氏裂聘時羅自經救之得甦仍歸於王撫孤守志同邑戴君緣

此題

哀莫哀於寡女絲堅莫堅於女貞枝清溪有女冰玉質鵲橋  
未渡傷靈匹此生未識聘時人聘時之羅空在室吁嗟哉聘  
時羅不作嫁時衾茫茫生死兩人心聘時羅不作嫁時裳望  
夫不見何所望裂得輕羅皎無滓計報所天惟一死投繯不  
帶泣嘸痕地下歡顏見夫子豈料昏昏夜未央室人暗炷返  
魂香一朝赴義哀情短半世孤眠苦節長去去麻衣潔如雪  
妾心不移如寸鐵分明死易立孤難夜深暗抱孤兒泣開箱  
重拂聘時羅疊疊重重血淚多雲冷霜高悲寡鵲青天碧海  
怨孀娥吁嗟哉哀莫哀於寡女絲堅莫堅於女貞枝君不見  
絲上繁音枝上月切切悽悽無盡時

趙松雪故宅古銀杏樹歌

甘棠橋畔月河曲長風夜夜號古木古木曾傳學士栽里人  
猶指王孫屋王孫一去五百年珊瑚玉樹空雲煙墨池已盡  
蘭若水蓮浦誰尋書畫船咄哉此物尙傑雄老幹百尺蟠蛟  
龍翻風蜿蜒欲飛去欲去未去擊秋空雷轟電掣不敢倒精  
神直與風雲通古來萬事更桑海晉杉蜀柏今安在三朝舊  
物老支離相逢會把神仙待我來作歌如有神走筆欲回枯  
朽春直須喚起雲陽叟聽說吳興舊主人

弔壯烈伯李忠毅公

儒將青年擅俊才翩翩人想舊丰裁雙鵬射獵龍沙去一劍  
酬恩海上來玉帳談兵橫短槩黃金求士築高臺

公曾散家財召募鄉

勇出

於今父老思裘帶愁聽天邊畫角哀

白波小醜太縱橫十載樓船事遠征絕徼鯨鯢曾築壘南荒



草木盡知名，然犀日擊天。吳影吹律風，多颺母聲遺。恨三呼河未渡，誰教精衛補東瀛。

聖明曾未識音容

丹詔頻邀

寵遇隆，忍聽百蠻傳變徵。空留

三錫待殊功，史臣筆挾風濤壯。麟閣圖描海氣雄，慚愧書生徒握管。爲公擊節唱悲翁。

借沈西邕

滿

登北固城樓晚眺

鷗飛風急暮雲邊，極望滄溟水拍天。斷岸白連千舸月，女牆青鎖萬家煙。藏春曲塢餘殘壘，橫弩雄關話昔年。盛世不憑天塹險，馬蹏蹠踐草芊絛。

匯沮圖歌

并序

匯沮在吳興北境明潘司空季馴故居也余屢經其地殘垣蔓草閒幾不可復識今秋過陳氏魚計亭補松主人出是圖見示長二尋餘中分南北二宅煙水空濛林嵐掩映几平橋曲徑畫閣珠樓風廊水榭之屬靡不畢具蓋潘氏盛時延名工所繪者今其子孫不能有而歸諸陳氏觀此彌增興替之感然故國喬木不存其地而存其圖洵足寶也爲作匯沮圖歌

苕溪北走水清激往復潏洄瀉空碧一鏡天開郭外明林塘雅稱煙霞癖回岑迤邐列圍屏老樹槎枒據磐石此地曾經卜築人百年悵望司空宅司空勛績著前朝瓠子歌成太樂調列戟高楣春浩蕩連雲別墅地寬饒於今人事屋霜換海市都成雲變幻游麴豪華曾幾時胥原阜隸應堪歎豐碑沒

土篆蝸微石柱橫流彩虹斷我欲臨風訪勝區  
兔葵搖落空江畔今年偶過太邱家  
祕帙標題照眼花留得生綃眞面在  
匯沮尺幅墨痕斜疏房邃館標南北  
月榭風亭看不足秋靄疑從檻外飛  
春波直到門前綠門前行馬簇重重  
洵是當年甲第雄置笏榻依珠幌底  
鳴騶路繞畫橋東一竿旌節階頭  
草累葉恩榮井上桐不信城南天尺  
五分明卻在畫圖中可憐此境空回  
首園林不及丹青久賸馥殘膏物尙  
存破垣斷瓦今烏有古來興廢幾滄  
桑何必千秋恨渺茫維有德功三不  
朽照來青史爛生光撫君此圖眞可  
寶不重名園重故老裴氏無人憶午  
橋丁令有鶴歸華表但看故物想伊  
人莫向秋風悲蔓草展卷彈琴有所  
思一聲響入煙波杳

樹上人

黃河昨秋決淮潁羅慘毒天吳夜橫行魚龍入人屋民生非  
禽鳥毆之上登木老弱半凍飢不復聞號哭官吏趨船救船  
盡繼桴竹猶患人過多恩不徇眾欲先之家一口聊以延似  
續妻使夫下船父使子相逐當此患難辰那復完骨肉須臾  
船已滿流駛去亦速去者無室家死生猶未卜回頭樹上人  
紛紛葬魚腹

覆舟女子行

大河生秋濤巨浸合淮浦溯洑赴瀆隄水力大於虎舟行當  
其衝猝不及篙櫓忽復巨石湊春焉浪中剖哀彼碎舟人呼  
急聲未吐行路豈無人誰肯急拯取須臾見波間皓腕約金  
縷利在始拯之此心已非古攜女置水旁氣絕面如土久乃  
瞋目視家室問何許旁人指中流云是葬腹所女乃痛復號

救我安所處眾死不獨生况乃失恃怙哀哀呼蒼天翻身入水府捐命雖慷慨取義良足予世有偷生人視此覆舟女

五月十四日抵京師作

兩年不到鳳城隈行處游蹤長綠苔舊友尙將青眼待山人仍著白衣來生無福命成高隱天與風塵鍊薄才祇恐光陰消馬上怕看華髮鬢邊催

孤館寒燈思悄然勝遊情事憶花前軍門長揖青荷佩東閣清尊翠玉筵拭目窮荒成遠別驚心宿草又經年平生風義增惆悵江月空懷李郭仙

楊

棨

初名枝宇 載 稜 號 吉 園 會 稽 人 嘉慶癸酉歲貢官 泰順訓導

許正綬曰吉園工書法教授里門賣字以老畫得元人旨趣然不輕作晚年得冷官已老病矣孫德祖曰先生與于先祖齒會家世以儒術名越郡年十四受知王文端相國補諸生中年又見賞學使寶東

臯吳蓉塘兩先生嘉慶元年舉孝廉方正力辭不赴年  
八十有三制行端嚴爲越士欽矚者殆七十年所謂鄉  
先生歿而  
可祀者也

訪元真子故里

唐高士元真子故廬卻在東郭市太虛爲室月爲鏡一生活  
計煙波裏左有漁童右樵青一一奴婢拜君賜不臣天子寵  
至此釣徒之中安有是湖洄我欲從之游伊人宛在河之渙  
宦途險阻多鄉味尊鱸美媿煞君家老季鷹思歸尙待秋風  
起

泊鷗吟社爲鏡西主人賦主人年登周甲歸自東嘉慕  
林泉之高致敦故舊之宿歡曾作泊鷗圖以寄意茲  
復聯同志十二人爲吟社第一會於栲栳精舍卽以  
是命題亦可見醉翁之意矣時嘉慶戊寅冬十一月

初三日

生不能置身霄漢上與鸞鶴同飛翀復不能脫離塵網飄然  
遐舉託冥鴻乃猶不思飲啄數前定長逐雞鶩爭食走西東  
得無笑倒江頭信天翁卓哉岑夫子於理觀其通垂老恥爲  
巢幕燕掉頭歸去翔晨風聯吟結社敦桑梓此舉直欲傲王  
公十二人符十二律五聲克諧旋爲宮一月兩會不疏亦不  
數準諸二十四氣將無同命以泊鷗名甚當於止知止謝樊  
籠春風楊柳陌秋月蘆葦叢生也有涯樂無窮鷗兮鷗兮且  
相狎世有同志何當索我若耶谿畔南湖中

詩集懷古

吾越夙稱山水窟代有騷人主風月峩峩壇坫卓東南萬壑  
千巖相映發自唐迄明凡幾年以詩名家累千百茲巢胡獨

取六君不惟其才惟其節緬昔黃冠歸去來見幾特早推狂  
客紀恩還以賀名湖一曲三公真不易白雲原上處士方姓  
氏不與科名列卻笑當年貌取人補脣先生聊自適公緒蕭  
然野鶴姿歷辭徵聘甘泉石遺構猶傳麗句亭五字長城摧  
屹屹老學庵前放翁居團扇新詩播芳潔北定無忘告乃翁  
丹心慙血血凝碧浙東提學有廉夫骨立蒼厓堅比鐵遼金  
特重編史才遺音更著麗情集青藤老筆擅瓌奇彷彿風馳  
與電掣三百年來無此人豈但七子非其匹人生富貴朝權  
榮既死還隨煙草沒惟有名垂炳日月任閱滄桑光不滅之  
六君者皆人豪忠孝緒餘兼多識臨厓結宇祀事崇千載辦  
香如可接松風時作臥龍吟長爲詩人壯魂魄

遊雲門訪王大令故宅



東晉風流遠烏衣往事空由來名士宅多作梵王宮默默憐  
之子超超似乃翁戒珠遺址在千載感應同

題柏堂上人聽月圖

問月何所有乃是七寶成匣以色相求從何得音聲世人聽  
以耳聲向耳中息道人聽以心聲向心中得蒲團兀坐當夜  
深靜聽不厭風露侵人各有心胡不聞人心擾擾名利熏但  
教參到光明藏自然聽徹鈞天響

題起鰲圖

前山後山鳴玉虎樹南樹北金蛇舞狂飈激水千丈高神物  
上騰天尺五舟人指點相聘貽疾急收帆爭捉鱗居民祇解  
覩靈奇循麓緣厓快先睹獨有安居草閣者欣欣喜色動眉  
宇大地不須愁蘊隆一日滂沱盡沃土吁嗟乎尺蠖求伸豈

偶然風雲際會成千古非關瀚海作波濤端爲蒼生施霖雨

### 李此山畫石歌

石之佳者縵瘦透鬼斧神功窮刻鏤世人畫石類米山潑墨  
淋漓稱傑構八山老漁李髯翁胸吞雲夢羅星宿古貌古情  
不可攀以書作畫特韶秀銀鉤鐵畫飛縱橫幻出雲根并泉  
竇磊落應爲席上珍肯教輕落人懷袖袁子石癖世所無瓊  
瑰盈几侈殷富哦詩常與石爲鄰開樽還取石爲侑況得老  
子爲寫圖人與石兮同長壽

張

龔字裘叔  
錢塘人

題陳朗玉司馬香畹樓憶語後卽寄汪允莊女甥

一夕罡風悵落花檀奴揮淚哭天涯香銷蘭畹吳宮月夢冷  
楓林楚岫霞碧漢殘星愁駕鵲白門疏柳怨啼鴉眞靈位業

知誰是翠水西頭夢綠華

傳來憶語護靈芸卻扇曾看月二分南國愁過桃葉渡西湖

待築菊香墳塵封鈿盒拋銀甲燭暗羅幃冷畫裙多病枕書

憐謝女斷腸新詠弔朝雲

陳

杞

字韞川號午亭晚

丁照序略菊丈天懷淡泊志潔品純工入法

喜吟詠構屋數椽階前藝菊有陶靖節遺風

胡敬曰韞川家東城之蒲場巷先世喜種菊韞川尤嗜

之手箸菊譜詳究花品及蓄土留種分秧登盆理緝調

養之法他有貴種必多方求之摘嫩芽歸植之無不活

每值重陽批紅判白察貳廉空至老不倦年逾八十以

菊姿自號

錢泰階曰韞川詩宗陸白閒涉繪事摹刻漢章筆法入

古嘗與胡書農吳蘭洲蔣稻香鄭菊城錢梅圖諸人共

結吟社所著冷香齋詩彙八卷

手鈔成帙書農蘭洲為之序

湖上即事次王錢湖原韻

結伴尋幽共嘯歌瓜皮小艇漾微波兩隄秋色上楊柳八月  
西風老菱荷沽酒一帘茅店小行吟七友布衣多游共葛林  
七人  
僧亦知音者約看南屏新翠螺

寒夜吟

布衾襖逾錦吉貝新裘棉夢醒柝聲遠鐙燼鑪火燃寒雞嘯  
夜半落月度窗前伏枕動詩興橫斜梅影妍

初夏邨落閒興用放翁韻

鱗塍入夏梅雨足閣閣蛙聲柳陰曲瘦竹一枝扶度橋亂踏  
落紅玩新綠芳草黏天殢蔚藍微風皺波漾湖淥撲人溼翠  
霑衣襟油碧鱗鱗碾游轂婪尾花開正餞春麥浪盈畦紫櫻  
熟蕭寺新篁已過牆老僧籬落插秧菊水禽拍翅共忘機蠶  
事初忙人碌碌鄉邨菴畫澹忘歸幾處炊煙起林麓

吳長卿

字更生錢塘人著夢游仙館集

宛廬詩話更生有築城詞云百金償博徒千金教歌舞役夫私語人此是城上土轟夷中田家公子行諸作不

是過也

### 題唐子畏小象

萬樹桃花一草庵天教才子老江南佯狂幸脫強藩禍任達  
虛傳委巷譚王李詞壇稱別調文仇畫筆好同參篁墩去後  
無知己滿腹穠生七不堪

錢時穎

字劍雲仁和人棧孫箬巒花吟稿

梳郡詩續輯劍雲生不好弄嗜詩詞兼喜古印章名碑舊硯書薄董趙鈞摹者悉開皇時故碣

### 載酒秋雪庵訪蘆花

曉晴放西溪溪煙盪空碧觥船多酒人柔櫓轉沙春榭葉連  
山紅楓林夾霜赤沿緣八九里鐘魚響猶隔移船水亭下傾

樽就孤石鷓鴣來親人沙上飛拍拍風鳴兩岸秋影戰一灘  
白笑我苦塵鞅頗未事幽僻辜負水鄉秋涼煙搖幾尺茲遊  
興未盡杯盤已狼藉歸舟月上時湖煙鳴格磔

宋震培

字小海仁和人

吳振棣傳略小海爲仲海孝廉之子卍角能詩長益嗜古曾在都中見之年十八遽卒于家使人於邑不已

送馬秀夫赴伊犁

馬氏白眉俠者流長征萬里歷荒陬舊游白帝孤城遠此去  
烏孫絕塞秋四月棗花開驛路一天芳草送行軒請君莫聽  
陽關曲古柳蕭蕭繫別愁

蔣

開

字冰壺海甯人著冰壺吟稿

潘謫人傳略冰壺少孤奉母孝爲學勤周大令方以實學訓後進冰壺相與論難多得其原委本末好吟詩格律疎秀得絃外致性耿介晚年館於破州族人澄村所冬月贈以裘笑謝曰吾以廉潔爲裘何須此耶

周春序略冰壺幼慧四齡即能讀唐律絕數百首毀齒即喜吟詠早歲失怙家貧奉母下帷家塾奮志讀書一門羣從皆從之游其論詩不區唐宋學其長而舍其短其為詩也本性情之正一氣渾成今之學者未能或之也先

夏夜審山晚步望智標塢

纖月淡林梢緩步尋幽勝山暝不逢人  
泠泠出清磬微風來  
松坡暮靄凝蘿徑何處辨浮圖一影矗危磴

春寒感懷鶴翎弟

料峭春寒重巖樓晝掩關客心傷夜雨詩思戀青山  
夢草吟空寄登樓人未還多情掃愁帚相對一酡顏

張感德 號松坡嘉興人著

徐升 卷石山房詩鈔 慕榮利隱于市日以吟詠自娛

杪秋過東林浮圖下

秋迴落木疏斜陽明遠寺偶攜素心人信行適吾意呼榜輒  
溪煙停撓搴汀芰澄鮮水容涼游魚在空際餘霞豁雙眸好  
風潔塵思水曲卽禪關橫竹石徑細風鈴響樹頭人語聒寒  
翠仰看塔影撐梯危勢將墜攀躋苦不能披襟坐榛翳

江上

江上秋風起暮愁碧天無際水空流一聲長笛孤村外人倚  
月明何處樓

岳

雲號雲谿嘉興人  
著金陀詩存

陳鱣序略君爲宋忠武鄂王二十四世嫡孫少孤奉母  
隱居琴書自適詩不拘一律而思深力厚味古氣和穆  
然想見其  
人品之高

懷陸處士

世事有代謝日月如轉轂念彼素心人寄食桐溪曲昔時明



月滿柴門來剝啄摘我園中蔬采我籬下菊今日北風涼寒  
雲覆茆屋圍鑪酌春酒顧影感羈獨何當賦歸來山中抱黃  
犢

胡金勝

字東井號夢香平湖諸生著聽秋室詩鈔四卷

縣志金勝能詩兼工倚聲吐屬名雋

晚春

碧草得春滋空階絕履綦晴檐蜂釀蜜暗壁蟾牽絲地僻栽  
花盛人閒度晝遲和風入庭樹又到試衫時

楊柳篇

種柳河上橋三年抽長條長條垂踈地來往多遊騎青絲作  
馬絡紅絲作馬轡下馬飲盃酒上馬折楊柳揮鞭從此去碧  
煙生滿樹年年楊柳青怕見相逢處

秋宵引

露華欲下苔衣冷一簾梧葉飛秋影美人遙夜按金徽明月  
滿階花氣靜統如鼓歇鑪煙微銀河澹澹曙星稀相思無語  
幄中坐寒逼蘭釭燭花妥

青浦

梨花如雪柳如煙三月東風泣杜鵑十里輕沙挑菜路半篙  
香水鬪泥船魚鰕遠市無平價茶筍空山不論錢羨殺江南  
風景好歸耕須買泖西田

秋思

搖落易悲秋依人悔壯遊殘燈窺客夢明月伴鄉愁事業憐  
磨鏡生涯笑刻舟空餘豪氣在夜夜拂吳鉤

沈榮慶

原名宸字升猷號東搏烏  
程諸生著念典齋詩鈔

墨香居畫識東搏性落拓不修邊幅  
書法適勁山水喜做大癡亦效雲林  
墨林今話東搏性冷能書工詩善山水七橋懷人詩云  
一運濃陰竹樹遮晚來消暑到君家詩人款客無他物  
破費半瓶梅水茶其風趣可想矣詩學孟東野盧玉川  
畫在大癡山樵閒蒼茫荒率無一筆涉畫史習嘗爲奚  
榆樓寫錢山阻雪圖不多  
箸墨意境寥遠余特賞之

長興縣齋呈邢佺山師

鎮日稀塵事幽懷近更澄  
官曹清似水客夢靜於僧  
散吏收詩草新篁迸石稜  
滿池秋月上一片玉壺冰

寓西堂懷施小愚先生

蓬轉曾無定才高但守貧  
迹猶羈幕府天竟老詩人坐憶青  
羶舊愁知白髮新幾時乘短艇  
煙水接比鄰

題畫

臨溪自葺小茅堂人語虛窗面面涼  
一片蘆花帶秋雪月明

何處打漁榔

沈三秀

字夢輝號石塘歸安諸生箸養拙老人稿

初春集緯蕭堂分用東坡韻

條風披重闌春氣動園柳歲序俄已遷撫景憐客久西陂大  
雅宗嚶鳴藉良友華屋敞晴暉芳筵置旨酒豁達開心顏縱  
談抒夙負知交淡逾真贈言情何厚問彼輒紅客此樂可曾  
有

登闕伯臺

埕澤城西落日黃沃土萬頃何茫茫中有古阜矗十仞卓錫  
削立鬱相望穹碑剝蝕盤螭踞云是闕伯遺荒岡粵聞伯也  
係帝譽分遷茲地由陶唐追維上下數千載居人歲祀猶飛  
揚簫鼓迎神厲壇去與臺光景長輝煌平臺水竹半榛莽梁

園賓客皆銷凶此臺巋然峙郊野勝迹直似魯靈光我來游  
眺躡危頂振衣自笑心傍惶平疇如掌樹如薺春泥融盡春  
草香泝水苾山互鉤帶磅礴一氣盤睢陽望古臨風三歎息  
聳身遐矚煙林蒼

過方越珊讀書處

萬綠陰森晝掩闕塵飛不到卽深山煙開傑閣諸天靜日落  
遙峯獨鳥還旨酒自邀明月共壯懷空對白雲閒多君文富  
猶埋照夜半書聲出水灣

盛植麒

字天石號藕塘慈谿人  
官安徽潁州府同知

尹元煒曰藕塘性開爽風流倜儻交遊甚盛而開誠相  
與正加公瑾醇醪使人心醉其詩喜作綺麗語晚歲則  
洗去鉛華獨標風格洵  
乎才人之不易測也

屋東新築小園

占雲課日任恩恩屋外還開地數弓身已投閒聊養拙詩惟  
卽景不求工鬢絲改舊星星白花事翻新月月紅知否陶潛  
歸去後榮枯隨分住籬東

王

銘

字裴山會稽人郡廩生著未巖詩文稿

馬廣良鄞教諭王君家傳略先生祖國秦籍時應父銘邑校高才生兩世胥以能書擅譽

長安月

萬戶擣砧急離愁上月鉤刀環何日唱夢入玉關秋

峩嶺月

玉盤墮峰巔一白不可極半輪山月秋疑積千年雪

秦淮月

明明秦時月湯湯秦淮河祖龍求靈藥胡不從姮娥

西湖月

湖光圓如面涼月為點晴冰壺濯玉魄上下兩空明

鄭衡號雪舫平陽諸生著雪舫詩藁

華文漪序略雪舫至性過人以親老常不肯遠館一月

中定省往返數四猶賺賺焉而弗安也今覽其篇凡涉

於家庭之作皆藹然孝弟有味乎其言之此真詩之本也

吳承志曰雪舫詩藁今已散佚嘗從儀山陳氏叢鈔本

中見其摘句冬日閒居雜詠云曾憐昌谷因詩瘦欲向

西河為義肥又云門無車馬交如水座有琴書意欲仙

折梅云瘦不嫌貧常臥雪清能醫俗即為仙梅窗夜雨

云敲殘曲院梨雲夜滴斷西湖花雪魂禪院寄懷云春

寒渭北詩多瘦雨滯江南夢未拋旅懷云人作春前春

後客地經水北水南村又云青燈夢去化千里細雨寒

閒居

養拙煙蘿地空山歲月深東狂防忌口居賤失知音酒倦常  
貪睡詩豪慣朗吟眼前秋色曉籬菊復如金

秋夜對月

莎蟲吟砌畔聲透菊花籬獨坐舒懷遠空山人未知木落枝頭禿星殘斗柄移祇憐蘿徑月伴我到書帷

野眺

落盡梨花雨打扉鴨頭波漲釣魚磯聲聲布穀催耕早刺水秧鍼綠正肥

旅懷

煙光淡抹射殘暉桐葉添黃綠漸稀燕子不知身似客秋來猶傍草堂飛

春夜

誅茅補屋枕平巒春淺煙蘿尙帶寒夜靜欲眠眠未得梅花疏影滿闌干



春曉

茅堂幽邃淡雲遮  
地仄林深住一家  
昨夜嫩寒春欲曉  
簾前開徧碧桃花

兩浙輶軒續錄卷二十七